

新唐書

冊一





新唐書

進新唐書表

臣公亮言竊惟唐有天下幾三百年其君臣行事之始終所以治亂興衰之蹟與其典章制度之美宜其燦然著在簡冊而紀次無法詳略失中文采不明事實零落蓋又百有五十年然後得以發揮幽深補緝闕亡黜正僞繆克備一家之史以爲萬世之傳成之至難理若有待臣公亮誠惶誠恐頓首頓首伏惟體天法道欽文總武聖神孝德皇帝陛下有虞舜之智而好問躬大禹之聖而克勤天下和乎民物安樂而猶垂心積精以求治要日與鴻生舊學講誦六經考覽前古以謂商周以來爲國長久惟漢與唐而不幸接乎五代衰世之士氣方卑弱言淺意陋不足以起其文而使明君賢臣雋功偉烈與夫昏虐賊亂禍根罪首皆不得暴其善惡以動人耳目誠不可以垂勸戒示久遠甚可歎也乃因邇臣之有言適契上心之所閱於是刊脩官翰林學士兼龍圖閣學士給事中知制誥臣歐陽修端明殿學士兼翰林侍讀學士龍圖閣學士尙書吏部侍郎臣宋祁與編脩官禮部郎中知制誥臣范鎮刑部郎中知制誥臣王疇太常博

士集賢校理臣宋敏求祕書丞臣呂夏卿著作佐郎臣劉義叟等並膺儒學之選悉發祕府之藏俾之討論共加刪定凡十有七年成二百二十五卷其事則增於前其文則省於舊至於名篇著目有革有因立傳紀實或增或損義類凡例皆有據依纖悉綱條具載別錄臣公亮典司事領徒費日月誠不足以成大典稱明詔無任慚懼戰汗屏營之至臣公亮誠惶誠懼頓首頓首謹言

嘉祐五年六月 日提舉編修推忠佐理功臣正奉大夫尙書禮部侍郎參知政事臣曾公亮上表

進新唐書表



唐書目錄

宋翰林學士歐陽修撰

本紀十

志五十

表十五

列傳一百五十 唐書共二百二十五卷

本紀

唐書卷一

本紀第一

高祖皇帝

唐書卷二

本紀第二

太宗皇帝

唐書卷三

本紀第三

高宗皇帝

唐書卷四

本紀第四

則天順聖武皇后

中宗皇帝

唐書卷五

本紀第五

睿宗皇帝

玄宗皇帝

唐書卷六

本紀第六

肅宗皇帝

代宗皇帝

唐書卷七

珍微宋版

本紀第七

德宗皇帝

順宗皇帝

憲宗皇帝

唐書卷八

本紀第八

穆宗皇帝

敬宗皇帝

文宗皇帝

武宗皇帝

宣宗皇帝

唐書卷九

本紀第九

懿宗皇帝

僖宗皇帝

唐書卷十

本紀第十

唐

書

目錄

一

中華書局



昭宗皇帝

哀皇帝

志

唐書卷十一

志第一

禮樂一

唐書卷十二

志第二

禮樂二

唐書卷十三

志第三

禮樂三

唐書卷十四

志第四

禮樂四

唐書卷十五

志第五

禮樂五

唐書卷十六

志第六

禮樂六

唐書卷十七

志第七

禮樂七

唐書卷十八

志第八

禮樂八

唐

書  
目錄

三  
中華書局聚

唐書卷十九

志第九

禮樂九

唐書卷二十

志第十

禮樂十

唐書卷二十一

志第十一

禮樂十一

唐書卷二十二

志第十二

禮樂十二

唐書卷二十三上



志第十三上

儀衛上

唐書卷二十三下

志第十三下

儀衛下

唐書卷二十四

志第十四

車服

唐書卷二十五

志第十五

曆一

唐書卷二十六

志第十六

唐

書

目錄

四一中華書局聚

曆二

唐書卷二十七上

志第十七上

曆三上

唐書卷二十七下

志第十七下

曆三下

唐書卷二十八上

志第十八上

曆四上

唐書卷二十八下

志第十八下

曆四下

唐書卷二十九

志第十九

曆五

唐書卷三十上

志第二十上

曆六上

唐書卷三十下

志第二十下

曆六下

唐書卷三十一

志第二十一

天文一

唐書卷三十二

唐

書

目錄

五  
中華書局



志第二十二

天文二

唐書卷三十三

志第二十三

天文三

唐書卷三十四

志第二十四

五行一

唐書卷三十五

志第二十五

五行二

唐書卷三十六

志第二十六

五行三

唐書卷三十七

志第二十七

地理一

唐書卷三十八

志第二十八

地理二

唐書卷三十九

志第二十九

地理三

唐書卷四十

志第三十

地理四

唐

書

目錄

六一中華書局聚

唐書卷四十一

志第三十一

地理五

唐書卷四十二

志第三十二

地理六

唐書卷四十三上

志第三十三上

地理七上

唐書卷四十三下

志第三十三下

地理七下

唐書卷四十四

志第三十四

選舉上

唐書卷四十五

志第三十五

選舉下

唐書卷四十六

志第三十六

百官一

唐書卷四十七

志第三十七

百官二

唐書卷四十八

志第三十八

百官三

唐書卷四十九上

志第三十九上

百官四上

唐書卷四十九下

志第三十九下

百官四下

唐書卷五十

志第四十

兵

唐書卷五十一

志第四十一

食貨一



唐書卷五十二

志第四十二

食貨二

唐書卷五十三

志第四十三

食貨三

唐書卷五十四

志第四十四

食貨四

唐書卷五十五

志第四十五

食貨五

唐書卷五十六

唐

書

目錄

八 中華書局聚

志第四十六

刑法

唐書卷五十七

志第四十七

藝文一

唐書卷五十八

志第四十八

藝文二

唐書卷五十九

志第四十九

藝文三

唐書卷六十

志第五十

藝文四

表

唐書卷六十一

表第一

宰相上

唐書卷六十二

表第二

宰相中

唐書卷六十三

表第三

宰相下

唐書卷六十四

表第四

唐

書

目錄

九

中華書局聚

方鎮一

唐書卷六十五

表第五

方鎮二

唐書卷六十六

表第六

方鎮三

唐書卷六十七

表第七

方鎮四

唐書卷六十八

表第八

方鎮五

唐書卷六十九

表第九

方鎮六

唐書卷七十一上

表第十上

宗室世系上

唐書卷七十下

表第十下

宗室世系下

唐書卷七十一上

表第十一上

宰相世系一上

唐書卷七十一下



表第十一 下

宰相世系 一下

唐書卷七十二上

表第十二 上

宰相世系 二上

唐書卷七十二中

表第十二 中

宰相世系 二中

唐書卷七十二下

表第十二 下

宰相世系 二下

唐書卷七十三上

表第十三 上

宰相世系三上

唐書卷七十三下

表第十三下

宰相世系三下

唐書卷七十四上

表第十四上

宰相世系四上

唐書卷七十四下

表第十四下

宰相世系四下

唐書卷七十五上

表第十五上

宰相世系五上

唐

書目錄

十一中華書局聚

唐書卷七十五下

表第十五下

宰相世系五下

列傳

唐書卷七十六

列傳第一 后妃上

太穆竇皇后

文德長孫皇后

徐賢妃

王皇后

則天武皇后

和思趙皇后

韋皇后 上官昭容

肅明劉皇后

昭成竇皇后

王皇后

貞順武皇后

元獻楊皇后

楊貴妃

唐書卷七十七

列傳第二 后妃下

張皇后

章敬吳皇后

貞懿獨孤皇后

睿真沈皇后

昭德王皇后 韋賢妃

莊憲王皇后

懿安郭太后

孝明鄭太后

恭僖王太后

貞獻蕭太后

宣懿章太后 尚宮宋若昭

郭貴妃

王賢妃

元昭曩太后

惠安王太后

郭淑妃

恭憲王太后

何皇后

唐書卷七十八

列傳第三 宗室

江夏王道宗 廣寧縣公道興

永安王孝基 涵

淮陽王道玄 漢

長平王叔良 郇國公孝協 新興郡王 彭國公思訓

長樂王幼良

襄武王琛

河間王孝恭 晦

漢陽王瓌

廬江王瑗

淮安王神通 膠東王道彥 梁郡公孝逸 國貞 屬說 齊物 復

襄邑王神符 從晦

隴西公博乂

渤海王奉慈 戡

唐書卷七十九

列傳第四 高祖二十二子

隱太子建成

衛王玄霸

巢王元吉

楚王智雲

荆王元景

漢王元昌



鄴王元亨

周王元方

徐王元禮

韓王元嘉 黃公讓

彭王元則

鄭王元懿

霍王元軌

號王鳳

道王元慶

鄧王元裕

舒王元名

魯王靈夔

江王元祥

密王元曉

滕王元嬰

唐書卷八十

列傳第五 太宗九王

常山王承乾

鬱林王恪 成王千里 趙國公 誼 吳王琬 吳王琚 信安王禕 吳王嶽

濮王泰

庶人祐

蜀王愔

蔣王暉之芳

越王貞琅琊王冲

紀王慎義陽王琮

曹王明嗣曹王臯 象古 道古

唐書卷八十一

列傳第六 三宗諸子

燕王忠

澤王上金

許王素節襄信王璆

孝敬皇帝弘裴居道

章懷太子賢邠王守禮 煇煌王承案

廣武王承宏

懿德太子重潤

譙王重福

節愍太子重俊

讓皇帝憲汝陽王 景儉 王雅 漢中王瑀

惠莊太子撝

惠文太子範嗣岐王珍

惠宣太子業嗣薛王知柔

唐書卷八十二

列傳第七 十一宗諸子

奉天皇帝琮

太子瑛

棣王琰

鄂王瑤

靖恭太子琬

光王琚

頴王璪

永王璘

壽王瑒

延王玢

盛王琦

豐王珙

汴王璿

越王係

承天皇帝俊

彭王儼

襄王儼 嗣王煜

恭懿太子侶

昭靖太子邈

睦王述

舒王誼

通王謚

虔王諒

肅王詳

文敬太子諫

鄴王經

惠昭太子寧

禮王暉

絳王悟

建王恪

懷懿太子湊

安王溶

悼懷太子普

陳王成美

莊恪太子永

通王滋

吉王保

德王裕

唐書卷八十三

列傳第八 諸帝公主

世祖一女

高祖十九女

太宗二十二女

高宗三女

中宗八女

睿宗十一女

玄宗二十九女

肅宗七女

代宗十八女

德宗十一女

順宗十一女

憲宗十八女

穆宗八女

敬宗三女

文宗四女

武宗七女

宣宗十一女

懿宗八女

僖宗二女

昭宗十一女

唐書卷八十四

列傳第九

李密 單雄信 祖君彥

唐書卷八十五

列傳第十

王世充

竇建德

唐書卷八十六



列傳第十一

薛舉 仁杲

李軌

劉武周

高開道

劉黑闥 徐圓朗

唐書卷八十七

列傳第十二

蕭銑

輔公祐

沈法興

李子通 朱粲

林士弘

張善安

梁師都 劉季真

唐書卷八十八

列傳第十三

劉文靜

裴寂 趙文恪

許世緒

李高遷

劉義節

錢九隴

樊三興

公孫武達

龐卿憚

張長孫

張平高

李安遠

馬三寶

李孟嘗

元仲文

秦行師

唐書卷八十九

列傳第十四

屈突通

尉遲敬德

張公謹 大安

秦瓊

唐儉 憲 次 扶 持 彥謙

段志玄 文昌 成式

唐書卷九十

列傳第十五

劉弘基

殷開山

劉政會 奇 崇魯 崇望 崇龜

許紹 圍師 欽寂 欽明

程知節

柴紹

任瓌

丘和 行恭

唐書卷九十一

列傳第十六

唐

書 目錄

六 中華書局聚

温大雅

彦博

大有

廷筠

皇甫無逸

李襲志

襲譽

廷皓

造

姜夔

行本

皎

慶初

晦

崔善為

李嗣真

唐書卷九十二

列傳第十七

杜伏威

闕稜

王雄誕

張士貴

李子和

苑君璋

羅藝

王君廓

唐書卷九十三

列傳第十八

李靖

客師

令問

彦芳

李勣

敬業

思文

唐書卷九十四

列傳第十九

侯君集

張亮

薛萬均 萬徹 劉世讓

劉蘭 萬備

李君羨 威彥師

盧祖尚

唐書卷九十五

列傳第二十

高儉 履行 真行 重

竇威軌 琮 德玄

抗 靜 誕

唐書卷九十六

列傳第二十一

房玄齡 遺愛

杜如晦 楚客 讓能

淹 元穎 審權

唐書卷九十七

列傳第二十二

魏徵 謏

唐書卷九十八

列傳第二十三

王珪 燕

薛收 元起 元敬 稷 伯陽

馬周 載

韋挺 待價 武 萬石

唐書卷九十九

列傳第二十四

李綱 安仁 安靜

李大亮 道裕 迥秀

戴胄 至德

劉洎 樂彥璋

崔仁師 湜 液 澄

唐書卷一百

列傳第二十五

陳叔達

楊恭仁 思訓 師道 執柔

封倫

裴矩

宇文士及

鄭善果 元璿

權萬紀 懷恩

閻立德 立本

蔣儼

章弘機 岳子

姜師度 強循

張知謩

唐書卷一百一

列傳第二十六

蕭瑀 鈞 嗣業 嵩 華 復 俛 倣 廩 遵 定

唐書卷一百二

列傳第二十七

岑文本 羲 長倩 格輔元

虞世南

李百藥 安期 褚亮 劉孝孫 李玄道 李守素

姚思廉 璠 班

令狐德棻 峘 李延壽 鄧世隆 顧胤

唐書卷一百三

列傳第二十八

蘇世長 良嗣 弁

韋雲起 方質



孫伏伽

張玄素

唐書卷一百四

列傳第二十九

于志寧

休烈

敖

琮

龐嚴

高季輔

張行成

易之  
昌宗

唐書卷一百五

列傳第三十

長孫无忌

敞

操

詮

順德

褚遂良

璆

韓瑗

來濟

恆

李義琰

巢

義琛

上官儀

唐書卷一百六

列傳第三十一

杜正倫

求仁

咸

崔知温

知悌

高智周 石仲覽

郭正一

趙弘智 來章

崔敦禮

楊弘禮 弘武 元禧 纂

盧承慶 齊卿

劉祥道 齊賢 從一

李敬玄 元素

劉德威 審禮 延景 昇

孫處約 佺

邢文偉 高子貢

唐書卷一百七

列傳第三十二

傅奕

呂才 方毅

陳子昂 王無競 趙元

唐書卷一百八

列傳第三十三

劉仁軌

裴行儉 光廷 稹 倩 均

婁師德

唐書卷一百九

列傳第三十四

崔義玄 神基 神慶 琳

楊再思 季昭

竇懷貞 兢

宗楚客 晉卿 紀處 訥

祝欽明 郭山 惲

王瓊

唐書卷一百一十

列傳第三十五 諸夷蕃將

史大奈

馮盎 智戴 子猷

阿史那社尒 忠

執失思力

契苾何力 明

黑齒常之

李謹行

泉男生 獻誠

李多祚 李湛

論弓仁 惟貞

尉遲勝

尙可孤

裴玠

唐書卷一百一十一

列傳第三十六

郭孝恪

張儉 延師

王方翼 珣

蘇定方

薛仁貴 訥

程務挺

嵩平從

王孝傑

唐休璟

張仁愿 張敬忠

王峻

唐書卷一百一十二

列傳第三十七

王義方

員半千 石抱忠

韓思彥 琬

蘇安恆

薛登

王求禮

柳澤範 爽

馮元常元淑

蔣欽緒沈清

唐書卷一百一十三

列傳第三十八

唐臨皎 紹

張文瓘文琮 錫 文收

徐有功商 彥若

唐書卷一百一十四

列傳第三十九

崔融從 能 慎田 安潛

徐彥伯

蘇味道

豆盧欽望史務滋 崔元綜 周允元

唐書卷一百一十五

列傳第四十

狄仁傑 光嗣 兼謨

郝處俊 象賢

朱敬則 仁軌

唐書卷一百一十六

列傳第四十一

王綝 備 遂 搏

韋思謙 承慶 嗣立 恒 濟 弘景

陸元方 象先 希聲 景倩 餘慶 景融

王及善

李日知

杜景佺

李懷遠 景伯 彭年

唐書卷一百一十七

列傳第四十二

裴炎 仙先

劉禕之 郭翰

魏玄同 恬

李昭德

吉頊



唐書卷一百一十八

列傳第四十三

張廷珪

韋湊 見素 繩 諤 虛 顛 知人

韓思復 朝宗 飲

宋務光 呂元泰

辛替否

李渤

裴潏 張臯

李中敏 李款 李甘

唐書卷一百一十九

列傳第四十四

武平一

李义

賈曾 至

白居易 行簡 敏中

唐書卷一百二十

列傳第四十五

桓彥範 盧襲秀 楊元琰

薛季昶 仲昌

敬暉

崔玄暉 渙 縱 碣

張柬之

袁恕己 高

唐書卷一百二十一

列傳第四十六

劉幽求

鍾紹京

崔日用 宗之 日知

王琚 張暉

王毛仲 李守德 陳玄禮

唐書卷一百二十二

列傳第四十七

魏元忠

韋安石 陟 斌 叔夏 紹 抗

郭震 字元振

唐書卷一百二十三

列傳第四十八

李嶠

蕭至忠

盧藏用

韋巨源

趙彥昭 和逢堯

唐書卷一百二十四

列傳第四十九

姚崇 奕合曷

宋璟 渾

唐書卷一百二十五

列傳第五十

蘇瓌 頽說震幹

張說 均埴

唐書卷一百二十六

列傳第五十一

魏知古

盧懷慎 奐

李元紘

杜暹 鴻漸

張九齡 拯仲方

韓休 洪混鼻洄

唐書卷一百二十七

列傳第五十二

張嘉貞 延賞次宗 弘靖嘉祐 文規

源乾曜 光裕洵

裴耀卿 佶

唐書卷一百二十八

列傳第五十三

蘇珣 晉

尹思貞

畢構 栩

李傑

鄭惟忠

王志愔

許景先

潘好禮

倪若水

席豫

齊澣 抗

唐書卷一百二十九

列傳第五十四

裴守真 子餘 行立

崔沔

盧從愿

李朝隱

王丘

嚴挺之 武 綬 澈

唐書卷一百三十

列傳第五十五

裴漼 寬 諳 胄

陽嶠

宋慶禮

楊瑒

崔隱甫

李尚隱

解琬

唐書卷一百三十一

列傳第五十六 宗室宰相

李適之

李峴

李勉

李夷簡

李程廓

李石福

李回

唐書卷一百三十二

列傳第五十七

劉子玄貺

滋迥

敦儒秩

鍊迅

吳兢

韋述

蔣乂係

曙偕

柳芳登

璟

沈既濟詢

唐書卷一百三十三

列傳第五十八

郭虔瓘

郭知運英傑



王君奩

張守珪

獻誠

獻恭

王忠嗣

牛仙客

唐書卷一百三十四

列傳第五十九

宇文融

韋堅

楊慎矜

王鉞

盧鉉

唐書卷一百三十五

列傳第六十

哥舒翰

曜

高仙芝

封常清

唐書卷一百三十六

列傳第六十一

李光弼

橐張伯儀

光進  
白光

荔非元禮  
陳利貞

郝廷玉  
侯仲莊

李國臣  
柏良器

白孝德  
烏承玘

唐書卷一百三十七

列傳第六十二

郭子儀

曜 鏐

晞 銛

承 曙

曩 幼明

昕 劍

唐書卷一百三十八

列傳第六十三

李嗣業

馬璘

李抱玉

抱真 緘

路嗣恭

應 恕

唐書卷一百三十九

列傳第六十四

房琯

孺 復 式

啓

張鎬

李泌

繁

唐書卷一百四十

列傳第六十五

崔圓

苗晉卿

裴冕

裴遵慶  
向樞

呂諲

唐書卷一百四十一

列傳第六十六

崔光遠

鄧景山  
崔瓘

魏少游

衛伯玉

李澄  
克寧

韓全義

盧從史

高霞寓

唐書卷一百四十二

列傳第六十七

李麟

楊綰

崔祐甫  
植

柳渾  
識

韋處厚

路隋

唐書卷一百四十三

列傳第六十八

高適

元結

李承

韋倫

薛珏 存慶

崔漢衡

戴叔倫

王翊 正雅 翊

徐申

郝士美

辛祕

唐書卷一百四十四

列傳第六十九

來瑱 裴茂

田神功 神玉

侯希逸

崔寧 蕘

嚴礪

唐書卷一百四十五

列傳第七十

元載卓英璘  
李少良

王縉黎幹

楊炎庾準

嚴郢

竇參申  
吳通玄

唐書卷一百四十六

列傳第七十一

李栖筠吉甫  
德脩

李鄴礪

唐書卷一百四十七

列傳第七十二

王思禮

魯炅

王難得子  
顏

辛雲京京  
杲

馮河清 姚況

李芄

李叔明 鼻

曲環

王虔休

盧羣

李元素

盧士玫

唐書卷一百四十八

列傳第七十三

令狐彰 建通

張孝忠 茂宗 裴夷直

陳楚昭

康日知 志睦 承訓

李洧

劉澶

田弘正 布牟

王承元

牛元翼 傅良弼 李實

史孝章

唐書卷一百四十九

列傳第七十四



劉晏

濛包佶

盧徵

潼李若初

元琇于頔

第五琦

班宏

王紹

李巽

唐書卷一百五十

列傳第七十五

李揆

常袞

趙憬

崔造

齊映

盧邁

唐書卷一百五十一

列傳第七十六

關播

李平元

董晉

劉全諒

陸長源

袁滋

趙宗儒

竇易直

唐書卷一百五十二

列傳第七十七

張鎰

姜公輔

武元衡 儒衡

李絳 璋

宋申錫

唐書卷一百五十三

列傳第七十八

段秀實 伯倫

劉海賓 凝

文楚

顏真卿

唐書卷一百五十四

列傳第七十九

李晟 愿

王愬

唐書卷一百五十五

列傳第八十

唐

書目錄

天中華書局聚

馬燧煬

渾瑊鐵

唐書卷一百五十六

列傳第八十一

楊朝晟

戴休顏

陽惠元曼

李元諒

李觀

韓游瓌

杜希全

邢君牙

唐書卷一百五十七

列傳第八十二

陸贄

唐書卷一百五十八

列傳第八十三

章阜津

張建封愔

劉闢

正貫

嚴震諱

韓弘公武充

唐書卷一百五十九

列傳第八十四

鮑防

李自良

蕭昕

薛播

樊澤宗師

王緯

吳湊士矩

鄭權

陸亘

盧坦閻濟美

柳晟

崔戎雍

唐書卷一百六十

列傳第八十五

徐浩

呂渭温恭

孟簡

劉伯芻寬夫允章

楊憑疑敬之

潘孟陽

崔元略鉉式 沆元受 崔龜從

韋綬

唐書卷一百六十一

列傳第八十六

張薦讀

趙涓博宣

李紆

鄭雲逵

徐岱

王仲舒

馮伉

庾敬休

唐書卷一百六十二

列傳第八十七

姚南仲

獨孤及明座 郁

顧少連

韋夏卿瓘

段平仲

呂元膺

許孟容 季同

薛存誠 廷老

李遜 方玄 建 訥

唐書卷一百六十三

列傳第八十八

孔巢父 殘 戢 緯 業 戡

穆寧 贊 質 員

崔邠 鄆 鄆 鄆

柳公綽 仲 鄆 玳 公 權 璞 珪 璧 子 華

楊於陵

馬總

唐書卷一百六十四

列傳第八十九

歸崇敬 登 融

奚陟

崔衍

盧景亮 王源中

薛苹 膺

衛次公 洙

薛戎 放

胡證



丁公著

崔弘禮

崔玄亮

王質

殷侗盈孫

王彥威

唐書卷一百六十五

列傳第九十

鄭餘慶澣從謙處誨

鄭珣瑜單朗裔綽

高郢定

鄭綱顯

權德輿疎

崔羣

唐書卷一百六十六

列傳第九十一

賈耽

杜佑式方惲孺休

令狐楚緒定綯

唐書卷一百六十七

列傳第九十二

白志貞

裴延齡

崔損

韋渠牟

李齊運

李實

皇甫鎛鎛

王播起式

唐書卷一百六十八

列傳第九十三

韋執誼

王叔文王伾

韓曄

陳諫

陸質

劉禹錫

柳宗元

程异

唐書卷一百六十九

列傳第九十四

杜黃裳勝

裴垪

李藩

章貫之 澳  
蕭綬 祐

唐書卷一百七十

列傳第九十五

高崇文 承簡

伊慎

朱忠亮

劉昌裔

范希朝

王鏐 稷

孟元陽

王栖霞 茂元

劉昌 士涇

趙昌

李景略

任迪簡

張萬福

高固 郝玘 野詩 良輔 史敬奉 附

唐書卷一百七十一

列傳第九十六

李光進 光顏

烏重胤 石洪 李珙

王沛 逢

楊元卿 廷宗

曹華

高瑀

劉沔

石雄

唐書卷一百七十二

列傳第九十七

于頔 季友

王智興 晏平

杜兼 羔中立

杜亞

范傳正

唐書卷一百七十三

列傳第九十八

裴度 諡

唐書卷一百七十四

列傳第九十九

李逢吉

元稹

牛僧孺

蔚叢

徽

李宗閔

楊嗣復

授損

爽

唐書卷一百七十五

列傳第一百

竇羣

常鞏

牟

劉栖楚

張又新

楊虞卿

漢公汝士

張宿

熊望

柏耆

唐書卷一百七十六

列傳第一百

韓愈

孟郊盧仝

張籍賈島

皇甫湜劉叉

唐書卷一百七十七

列傳第一百二

錢徽 珣

崔咸

韋表微

高鈇 湜 錡

湘 銖

馮宿 定 審

李虞仲

李翱

盧簡辭 知 猷 簡 求

弘 止 汝 弼

高元裕 少 逸 璩

封敖

鄭薰

敬晦

韋博

李景讓 景 温

唐書卷一百七十八

列傳第一百三

劉蕡

唐書卷一百七十九

列傳第一百四



李訓

鄭注

王涯

賈鍊

舒元興

王璠

郭行餘  
李孝本

韓約  
顏師邕

羅立言  
李貞素

唐書卷一百八十

列傳第一百五

李德裕

燁  
崔嘏

延古  
丁柔立

唐書卷一百八十一

列傳第一百六

陳夷行

李紳

李讓夷

曹確

劉瞻

助

李蔚

唐書卷一百八十二

列傳第一百七

李固言

李珣

崔珙 涓 瑄 遠

蕭鄴

鄭肅 仁 表 商

盧鈞 簡 方

韋琮

周墀

裴休

劉瑒 夏 侯 孜

趙隱

裴坦 贊

鄭延昌

王溥

盧光啓 韋 貽 範

唐書卷一百八十三

列傳第一百八

畢誠

崔彥昭

劉鄴 豆 盧 瑒

陸辰

鄭絜

朱朴 孫 偃

韓偓儀

唐書卷一百八十四

列傳第一百九

馬植

楊收發

嚴

路巖韋保衡

盧攜

唐書卷一百八十五

列傳第一百十

鄭畋

王鐸錄

王徽

韋昭度

張濬

唐書卷一百八十六

列傳第一百一十一

周寶

王處存部

鄧處訥 雷滿

陳儒

劉巨容 馮行襲

趙德誣 匡凝

楊守亮

楊晟

顏彥朗 彥暉

唐書卷一百八十七

列傳第一百一十二

王重榮 珙珂

諸葛爽

李罕之

王敬武 師範

孟方立 遷

唐書卷一百八十八

列傳第一百一十三

楊行密

時溥

朱宣

孫儒

唐書卷一百八十九

列傳第一百一十四

高仁厚

趙犖翬

田頽

朱延壽

唐書卷一百九十

列傳第一百一十五

劉建鋒馬殷 殷弟寶

成汭

杜洪

鍾傳

劉漢宏

張雄馮弘鐸 徐約

王潮審邽

劉知謙盧光稠

唐書卷一百九十一

列傳第一百一十六 忠義上

夏侯端

劉感

常達

敬君弘 馮立 謝叔方

呂子臧 馬元規

王行敏 盧士叡

羅士信

張道源 楚金

李育德 李公逸

高叡 仲舒

安金藏

王同皎 周憬

吳保安

李澄 彭源

盧奕 元輔

張介然 崔無諤

唐書卷一百九十二

列傳第一百二十七 忠義中

顏杲卿 春卿

賈循 隱林

張巡

許遠 南霁雲 雷萬春

唐書卷一百九十三

列傳第一百二十八 忠義下



程千里 袁光廷

龐堅 薛愿

張興

蔡廷玉

符令奇 璘

劉迺

孟華

張伾

周曾

張名振

石演芬

吳淑

高沐

賈直言

辛讜

黃碣 孫揆

唐書卷一百九十四

列傳第一百二十九 卓行

元德秀 李萼

權臯

甄濟

陽城 何蕃

司空圖

唐書卷一百九十五

列傳第一百二十 孝友

李知本

張志寬

劉君良

王少玄

任敬臣

支叔才

程袁師

武弘度

宋思禮

鄭潛曜

元讓

裴敬彝

梁文貞

沈季詮

許伯會

陳集原

陸南金

張琇

侯知道

程俱羅

許法慎

林攢

陳饒奴

王博武

萬敬儒

章全益

唐書卷一百九十六

列傳第一百二十一 隱逸

王績

朱桃椎

孫思邈

田游巖 史德義

孟詵

王友貞

王希夷

李元愷

衛大經

武攸緒

白履忠

盧鴻

吳筠

潘師正 劉道合  
司馬承禎

賀知章

秦系

張志和

孔述睿

敏行

陸羽

崔覲

陸龜蒙

唐書卷一百九十七

列傳第一百二十二 循吏

章仁壽

陳君賓

張允濟 李桐客

李素立 至遠 畬

薛大鼎 克權

賈敦頤 敦實 楊德幹

田仁會 歸道

裴懷古

韋景駿

李惠登

羅珣 讓

章丹 宙 岫

盧弘宣

薛元賞

何易于

唐書卷一百九十八

列傳第一百二十三 儒學上

徐文遠

陸德明

曹憲

顏師古

相時游秦

孔穎達

王恭馬嘉運

歐陽詢

通

朱子奢

張士衡

賈大隱

張後胤

蓋文達

文懿

谷那律

從政

蕭德言

許叔牙子儒

敬播

劉伯莊劉訥言

秦景通

羅道琮

唐書卷一百九十九

列傳第一百二十四 儒學中

郎餘令

餘慶

徐齊聃

堅嶠

沈伯儀

路敬淳

敬潛

王元感

王紹宗

彭景直

盧粲

尹知章

張齊賢

柳沖

馬懷素

殷踐猷 寅

孔若思 季詡至

唐書卷二百

列傳第一百二十五 儒學下

褚无量 徐安貞

元行沖

陳貞節

施敬本

盧履冰

王仲丘

康子元 侯行果

趙冬曦 尹愔鄭欽說

陸堅 盧僕

啖助

韋彤

陳京

暢當

林蘊

韋公肅

許康佐

唐

書

目錄

五

中華書局聚



唐書卷二百一

列傳第一百二十六 文藝上

袁朗 諱利貞 承序

賀德仁 庚抱

蔡允恭

謝偃

崔信明 鄭世翼

劉延祐 藏器知柔

張昌齡

崔行功 銑

杜審言 易簡甫

王勃 勳 照隣

助賓王

楊炯

元萬頃 正履冰

義方 周思茂

季方 胡楚賓

唐書卷二百二

列傳第一百二十七 文藝中

李適 韋元旦 宋之問

劉允濟 閻朝隱

沈佺期

尹元愷 富嘉謨

劉憲

李邕

呂向

王翰

遜逃成簡

李白張旭

王維

鄭虔

蕭穎士存柳并

陸據皇甫冉

蘇源明梁肅

唐書卷二百三

列傳第一百二十八 文藝下

李華觀翰

孟浩然王昌齡 崔顥

劉太真

邵說

于邵

崔元翰

于公異

李益

盧綸

歐陽詹柜

李賀

吳武陵

李商隱

薛逢

李頻

吳融

唐書卷二百四

列傳第一百二十九 方技

李淳風

甄權 許胤宗  
張文仲

袁天綱 客師  
金梁鳳

張憬藏  
王遠知

乙弗弘禮

薛頤 葉法善

明崇儼

尙獻甫

嚴善思

杜生

張果 邢和璞  
羅思遠

師夜光

姜撫

桑道茂

唐書卷二百五

列傳第一百三十一 列女

李德武妻裴淑英

楊慶妻王

房玄齡妻盧

獨狐師仁姆王蘭英

楊三安妻李

樊會仁母敬

衛孝女無忌

鄭義宗妻盧

劉寂妻夏侯碎金

于敏直妻張

楚王靈龜妃上官

楊紹宗妻王

賈孝女

李氏妻王阿足

樊彥琛妻魏

李畬母

汴女李

崔繪妻盧

堅貞節婦李

符鳳妻玉英

高窳妻秦

王綝妻章

盧惟清妻徐

饒娥

竇伯女仲女

盧甫妻李

鄒侍徵妻薄

金節婦

高愍女

楊烈婦

賈直言妻董

李孝女妙法

李湍妻

董昌齡母楊

王孝女和子

段居貞妻謝

楊含妻蕭

韋雍妻蕭

衡方厚妻程

鄭孝女

李廷節妻崔

殷保晦妻封絢

竇烈婦

李拯妻盧

山陽女趙

周迪妻

朱延壽妻王

唐書卷二百六

列傳第一百三十一 外戚

獨孤懷恩

武士護士稜  
三思

懿宗士逸

承嗣攸登

韋温

王仁皎宰

楊國忠

李脩

鄭光

唐書卷二百七

列傳第一百三十二 宦者上

楊思勗

高力士

程元振

駱奉先

魚朝恩

竇文場

霍仙鳴

劉貞亮

吐突承璀

馬存亮

嚴遵美

仇士良

楊復光

唐書卷二百八

列傳第一百三十三 宦者下

李輔國

王守澄

劉克明

田令孜

楊復恭

劉季述

韓全誨 張彥弘

唐書卷二百九

列傳第一百三十四 酷吏

索元禮

來俊臣 來子珣 丘神勣 周興

侯思止

王弘義

郭弘霸

姚紹之

周利貞

王旭

吉溫 羅希爽

崔器

毛若虛

敬羽

唐書卷二百一十

列傳第一百三十五 藩鎮魏博

田承嗣 悅懷諫 季安 史憲誠

何進滔 弘敬 全皞 樂彥復 韓允中



羅弘信 紹威

唐書卷二百一十一

列傳第一百三十六 藩鎮鎮冀

李寶臣 惟岳 惟簡

王武俊 士真 承宗

王廷湊 元逵 景崇

紹鼎 紹懿

唐書卷二百一十二

列傳第一百三十七 藩鎮盧龍

李懷仙

朱滔

劉怱 濟 總

朱克融

李載義 楊志誠 史元忠

張仲武 直方

張允伸 張公素

李茂勳 可舉

李全忠 匡威 匡範

劉仁恭

唐書卷二百一十三

列傳第一百三十八 藩鎮淄青橫海

李正己 納師道 師古

程日華 懷直 懷信

李全略 同捷

唐書卷二百一十四

列傳第一百三十九 藩鎮宣武彰義澤潞

劉玄佐 鄧惟恭

吳少誠 少陽 元濟

劉悟 從諫 積 李丕

李佐之

唐書卷二百一十五上

列傳第一百四十上

突厥上

唐書卷二百一十五下

列傳第一百四十下

突厥下

唐書卷二百一十六上

列傳第一百四十一上

吐蕃上

唐書卷二百一十六下

列傳第一百四十一下

吐蕃下

唐書卷二百一十七上

列傳第一百四十二上

回鶻上

唐書卷二百一十七下

列傳第一百四十二下

回鶻下

唐書卷二百一十八

唐

書目錄

中華書局聚

列傳第一百四十三

沙陀

唐書卷二百一十九

列傳第一百四十四 北狄

契丹

奚

室韋

黑水靺鞨

渤海

唐書卷二百二十

列傳第一百四十五 東夷

高麗

百濟

新羅

日本

流鬼

唐書卷二百二十一上

列傳第一百四十六上 西域上

泥婆羅

党項

東女

高昌

吐谷渾

焉耆

龜茲

跋祿迦

疏勒

朱俱

波

甘棠

于闐

天竺

摩揭陀

罽賓

唐書卷二百二十一下

列傳第一百四十六下

西域下

康

寧遠

大勃律

吐火羅

謝颺

識匿

箇失密

骨咄

蘇毗

師子

波斯

拂菻

大食

唐書卷二百二十二上

列傳第一百四十七上 南蠻上

南詔上

唐書卷二百二十二中

列傳第一百四十七中 南蠻中

南詔下

蒙  
遜  
詔

越  
浪  
詔

浪  
穹  
詔

唐書卷二百二十二下

列傳第一百四十七下 南蠻下

環王

盤盤

扶南

真臘

珍佛宋版

訶陵

投和

瞻博

室利佛逝

名蔑

單單

驃

兩巒蠻

南平獠

西原蠻

唐書卷二百二十三上

列傳第一百四十八上 姦臣上

許敬宗

李義府

傅游藝

李林甫

陳希烈

唐書卷二百二十三下

列傳第一百四十八下 姦臣下

盧杞

崔胤



崔昭緯

柳璨蔣玄暉

張廷恭

唐書卷二百二十四上

列傳第一百四十九上 叛臣上

僕固懷恩

周智光

梁崇義

李懷光

陳少游

李錡

唐書卷二百二十四下

列傳第一百四十九下 叛臣下

李忠臣

喬琳

高駢

朱玫

王行瑜

陳敬瑄

李巨川

唐書卷二百二十五上

列傳第一百五十上 逆臣上

安祿山 慶緒 高尙

史思明 朝義

唐書卷二百二十五中

列傳第一百五十中 逆臣中

李希烈 朱泚

唐書卷二百二十五下

列傳第一百五十下 逆臣下

黃巢 秦宗權

董昌

唐書釋音共二十五卷 附

唐書目錄

唐書目錄

中華書局聚

唐書卷一

宋 翰 林 學 士 歐 陽 修 撰

本紀第一

高祖神堯大聖大光孝皇帝諱淵字叔德姓李氏隴西成紀人也其七世祖暹當晉末據秦涼以自王是爲涼武昭王暹生歆歆爲沮渠蒙遜所滅歆生重耳魏弘農太守重耳生熙金門鎮將戍于武川因留家焉熙生天賜爲幢主天賜生虎西魏時賜姓大野氏官至太尉與李弼等八人佐周代魏有功皆爲柱國號八柱國家周閔帝受魏禪虎已卒乃追錄其功封唐國公諡曰襄襄公生昞襲封唐公隋安州總管柱國大將軍卒諡曰仁仁公生高祖於長安體有三乳性寬仁襲封唐公隋文帝獨孤皇后高祖之從母也以故文帝與高祖相親愛文帝相周復高祖姓李氏以爲千牛備身事隋譙隴二州刺史大業中歷岐州刺史滎陽樓煩二郡太守召爲殿內少監衛尉少卿煬帝征遼東遣高祖督運糧於懷遠鎮楊玄感將反其兄弟從征遼者皆逃歸高祖先覺以聞煬帝遽班

師以高祖爲弘化留守以禦玄感詔關右諸郡兵皆受高祖節度是時隋政荒天下大亂煬帝多以猜忌殺戮大臣嘗以事召高祖高祖遇疾不時謁高祖有甥王氏在後宮煬帝問之王氏對以疾煬帝曰可得死否高祖聞之益懼因縱酒納賂以自晦十一年拜山西河東慰撫大使擊龍門賊母端兒射七十發皆中賊敗去而斂其尸以築京觀盡得其箭於其尸又擊絳州賊柴保昌降其衆數萬人突厥犯塞高祖與馬邑太守王仁恭擊之隋兵少不敵高祖選精騎二千爲遊軍居處飲食隨水草如突厥而射獵馳騁示以閒暇別選善射者伏爲奇兵虜見高祖疑不敢戰高祖乘而擊之突厥敗走十三年拜太原留守擊高陽歷山飛賊甄翟兒於西河破之是時煬帝南遊江都天下盜起高祖子世民知隋必亡陰結豪傑招納亡命與晉陽令劉文静謀舉大事計已決而高祖未之知欲以情告懼不見聽高祖留守太原領晉陽宮監而所善客裴寂爲副監世民陰與寂謀寂因選晉陽宮人私侍高祖高祖過寂飲酒酒酣從容寂具以大事告之高祖大驚寂曰正爲宮人奉公事發當誅爲此爾世民因亦入白其

事高祖初陽不許欲執世民送官已而許之曰吾愛汝豈忍告汝邪然未有以發而所在盜賊益多突厥數犯邊高祖兵出無功煬帝遣使者執高祖詣江都高祖大懼世民曰事急矣可舉事已而煬帝復馳使者赦止高祖其事遂已是時劉武周起馬邑林士弘起豫章劉元進起晉安皆稱皇帝朱粲起南陽號楚帝李子通起海陵號楚王邵江海據岐州號新平王薛舉起金城號西秦霸王郭子和起榆林號永樂王竇建德起河間號長樂王王須拔起恆定號漫天王汪華起新安杜伏威起淮南皆號吳王李密起鞏號魏公王德仁起鄴號太公左才相起齊郡號博山公羅藝據幽州左難當據涇馮盎據高羅皆號總管梁師都據朔方號大丞相孟海公據曹州號錄事周文舉據淮陽號柳葉軍高開道據北平張長孫據五原周洸據上洛楊士林據山南徐圓朗據兗州楊仲達據豫州張善相據伊汝王要漢據汴州時德叡據尉氏李義滿據平陵綦公順據青萊淳于難據文登徐師順據任城蔣弘度據東海王薄據齊郡蔣善合據鄆州田留安據章丘張青特據濟北臧君相據海州殷恭邃據舒州周法明據

永安苗海潮據永嘉梅知巖據宣城鄧文進據廣州俚酋楊世略據循潮冉安昌據巴東甯長真據鬱林其別號諸盜往往屯聚山澤而劉武周攻汾陽宮高祖乃集將吏告曰今吾爲留守而賊據離宮縱賊不誅罪當死然出兵必待報今江都隔遠後期奈何將吏皆曰國家之利可專者公也高祖曰善乃募兵旬日間得衆一萬副留守虎賁郎將王威虎牙郎將高君雅見兵大集疑有變謀因禱兩晉祠以圖高祖高祖覺之乃陰爲備五月甲子高祖及威君雅視事開陽府司馬劉政會告威君雅反卽坐上執之丙寅突厥犯邊高祖令軍中曰人告威君雅召突厥今其果然遂殺之以起兵遣劉文靜使突厥約連和六月己卯傳檄諸郡稱義兵開大將軍府置三軍以子建成爲隴西公左領軍大都督左軍隸焉世民爲燉煌公右領軍大都督右軍隸焉元吉爲姑臧公中軍隸焉裴寂爲長史劉文靜爲司馬石艾縣長殷開山爲掾劉政會爲屬長孫順德王長諧劉弘基竇琮爲統軍開倉庫賑窮乏七月壬子高祖杖白旗誓衆於野有兵三萬以元吉爲太原留守癸丑發太原甲寅遣將張綸徇下離石龍泉文城



三郡丙辰次靈石營於賈胡堡隋虎牙郎將宋老生屯於霍邑以拒義師丙寅  
隋鷹揚府司馬李軌起武威號大涼王八月辛巳敗宋老生於霍邑丙戌下臨  
汾郡辛卯克絳郡癸巳次龍門突厥來助隋驍衛大將軍屈突通守河東絕津  
梁壬寅馮翊賊孫華土門賊白玄度皆具舟以來逆九月戊午高祖領太尉加  
置僚佐以少牢祀河乃濟甲子次長春宮丙寅隴西公建成劉文靜屯永豐倉  
守潼關燉煌公世民自渭北徇三輔從父弟神通起兵於鄠柴氏婦高祖女也  
亦起兵於司竹皆與世民會鄠賊丘師利李仲文整屋賊何潘仁向善思宜君  
賊劉炅等皆來降因略定鄠杜壬申高祖次馮翊乙亥燉煌公世民屯阿城隴  
西公建成自新豐趨霸上丙子高祖自下邳以西所經隋行宮苑籞悉罷之出  
宮女還其家十月辛巳次長樂宮有衆二十萬隋留守衛文昇等奉代王侑守  
京城高祖遣使諭之不報乃圍城下令曰犯隋七廟及宗室者罪三族丙申隋  
羅山令蕭銑自號梁公十一月丙辰克京城命主符郎宋公弼收圖籍約法十  
二條殺人劫盜背軍叛者死癸亥遙尊隋帝爲太上皇立代王爲皇帝大赦改



元義寧甲子高祖入京師至朝堂望闕而拜隋帝授高祖假黃鉞使持節大都督內外諸軍事大丞相錄尚書事進封唐王以武德殿爲丞相府下教曰令視事於虔化門十二月癸未隋帝贈唐襄公爲景王仁公爲元王夫人竇氏爲唐國妃諡曰穆以建成爲唐國世子世民爲唐國內史徙封秦國公元吉爲齊國公丞相府置長史司錄以下官趙郡公孝恭徇山南甲辰雲陽令詹俊徇巴蜀二年正月丁未隋帝詔唐王劍履上殿入朝不趨贊拜不名加前後羽葆鼓吹戊午周洸降戊辰世子建成爲左元帥秦國公世民爲右元帥徇地東都二月己卯太常卿鄭元璿定樊鄧使者馬元規徇荆襄三月己酉齊國公元吉爲太原道行軍元帥乙卯世民徙封趙國公丙辰隋右屯衛將軍宇文化及弒太上皇於江都立秦王浩爲皇帝吳興郡守沈法興據丹陽自稱江南道總管樂安人盧祖尚據光州自稱刺史戊辰隋帝進唐王位相國總百揆備九錫唐國置丞相等官立四廟四月己卯張長祿降辛巳停竹使符班銀蕤符五月乙巳隋帝命唐王冕十有二旒建天子旌旗出警入蹕甲寅王德仁降戊午隋帝遜於

位以刑部尙書蕭造司農少卿裴之隱奉皇帝璽紱於唐王三讓乃受武德元年五月甲子卽皇帝位於太極殿命蕭造兼太尉告於南郊大赦改元賜百官庶人爵一級義師所過給復三年其餘給復一年改郡爲州太守爲刺史庚午太白晝見隋東都留守元文都及左武衛大將軍王世充立越王侗爲皇帝六月甲戌趙國公世民爲尙書令裴寂爲尙書右僕射知政事劉文靜爲納言隋民部尙書蕭瑀丞相府司錄參軍竇威爲內史令丙子太白晝見己卯追謚皇高祖曰宣簡公皇曾祖曰懿王皇祖曰景皇帝廟號太祖祖妣梁氏曰景烈皇后皇考曰元皇帝廟號世祖妣獨孤氏曰元貞皇后妃竇氏曰穆皇后庚辰立世子建成爲皇太子封世民爲秦王元吉齊王癸未薛舉寇涇州秦王世民爲西討元帥劉文靜爲司馬太僕卿宇文明達招慰山東乙酉奉隋帝爲鄴國公詔曰近世時運遷革前代親族莫不夷絕歷數有歸實惟天命興亡之效豈伊人力前隋蔡王智積等子孫皆選用之癸巳禁言符瑞者辛丑竇威薨黃門侍郎陳叔達判納言將作大匠竇抗兼納言七月壬子劉文靜及薛舉戰於涇州

一珍傳宋版均  
敗績乙卯郭子和降庚申廢隋離宮八月壬申劉文靜除名戊寅約功臣怨死  
罪辛巳薛舉卒壬午李軌降甲申巖州刺史王德仁殺招慰使宇文明達以反  
己丑秦王世民爲西討元帥以討薛仁果庚子贈隋太常卿高頴上柱國郟國  
公上柱國賀若弼杞國公司隸大夫薛道衡上開府臨河縣公刑部尙書宇文  
弼上開府平昌縣公左翊衛將軍董純柱國狄道公右驍衛將軍李金才上柱  
國申國公左光祿大夫李敏柱國觀國公諸遭隋枉殺而子孫被流者皆還之  
九月乙巳慮囚始置軍府癸丑改銀菟符爲銅魚符甲寅秦州總管竇軌及薛  
仁果戰敗績辛未字文化及殺秦王浩自稱皇帝十月壬申朔日有食之己卯  
李密降壬午朱粲陷鄧州刺史呂子臧死之乙酉邵江海降己亥盜殺商州刺  
史泉彥宗辛丑大閱是月竇抗罷十一月竇建德敗王須拔於幽州須拔亡入  
於突厥乙巳涼王李軌反戊申禁獻侏儒短節小馬庫牛異獸奇禽者己酉秦  
王世民敗薛仁果執之癸丑行軍總管趙慈景攻蒲州隋刺史堯君素拒戰執  
慈景癸亥秦王世民俘薛仁果以獻十二月壬申世民爲太尉丙子蒲州人殺

堯君素立其將王行本辛巳鄭元璠及朱粲戰於商州敗之乙酉如周氏陂丁亥至自周氏陂庚子光祿卿李密反伏誅是歲高開道陷漁陽號燕王

二年正月甲子陳叔達兼納言詔自今正月五月九月不行死刑禁屠殺丙寅張善相降己巳楊士林降二月乙酉初定租庸調法令文武官終喪丙戌州置宗師一人甲午赦并浩介石四州賈胡堡以北繫囚閏月竇建德陷邢州執總管陳君賓辛丑竇建德殺字文化及於聊城朱粲降壬寅皇太子及秦王世民裴寂巡於畿縣乙巳御史大夫段確勞朱粲於菊潭庚戌微行察風俗乙卯以穀貴禁關內屠酤左屯衛將軍何潘仁及山賊張子惠戰於司竹死之丁巳虜囚庚申驍騎將軍趙欽王娑羅及山賊戰於整屋死之丁卯王世充陷殷州陟州刺史李育德死之三月甲戌王薄降庚辰蔣弘度徐師順降丁亥竇建德陷趙州丁酉李義滿降四月慕容公順降庚子并州總管齊王元吉及劉武周戰於榆次敗績辛丑朱粲殺段確以反乙巳王世充廢越王侗自稱皇帝癸亥陷伊州執總管張善相五月庚辰涼州將安脩仁執李軌以降癸未曲赦涼甘瓜鄯

肅會蘭河廓九州六月王世充殺越王侗戊戌立周公孔子廟於國子監庚子  
竇建德陷滄州丁未劉武周陷介州癸亥裴寂爲晉州道行軍總管離石胡劉  
季貞叛陷石州刺史王儉死之七月壬申徐圓朗降八月丁酉鄴國公薨甲子  
竇建德陷洛州執總管袁子幹九月辛未殺戶部尙書劉文靜李子通自稱皇  
帝沈法興自稱梁王丁丑杜伏威降裴寂及劉武周戰於介州敗績右武衛大  
將軍姜寶誼死之庚辰竇建德陷相州總管呂珉死之辛巳劉武周陷并州庚  
寅太白晝見竇建德陷趙州執總管張志昂乙未京師地震梁師都寇延州鄜  
州刺史梁禮死之十月己亥羅藝降乙卯如華陰赦募士背軍者壬戌劉武周  
寇晉州永安王孝基及工部尙書獨孤懷恩陝州總管于筠內史侍郎唐儉討  
之甲子祠華山是月夏縣人呂崇茂反秦王世民討劉武周十一月丙子竇建  
德陷黎州執淮安王神通總管李世勣十二月丙申獵於華山永安王孝基及  
劉武周戰於下邳敗績壬子大風拔木

三年正月己巳獵於渭濱戊寅王行本降辛巳如蒲州癸巳至自蒲州二月丁

西京師西南地有聲庚子如華陰甲寅獨孤懷恩謀反伏誅辛酉檢校隰州總管劉師善謀反伏誅三月庚午改納言爲侍中內史令爲中書令甲戌中書侍郎封德彝兼中書令乙酉劉季真降四月丙申祠華山壬寅至自華陰癸卯禁關內諸州屠甲寅秦王世民及宋金剛戰於雀鼠谷敗之辛酉王世充陷鄧州總管雷四郎死之壬戌秦王世民及劉武周戰於洛州敗之武周亡入於突厥克并州五月壬午秦王世民屠夏縣六月丙申赦晉隰潞并四州癸卯詔隋帝及其宗室樞在江都者爲營窆置陵廟以故宮人守之丙午慮囚封子元景爲趙王元昌魯王元亨鄭王元出宮女五百人賜東征將士有功者甲寅顯州長史田瓚殺行臺尙書令楊士林叛附於王世充乙卯瘞州縣暴骨七月壬戌秦王世民討王世充甲戌皇太子屯於蒲州以備突厥丙戌梁師都導突厥稽胡寇邊行軍總管段德操敗之八月庚子慮囚甲辰時德劼降九月癸酉田瓚降己丑給復陝鼎熊毅四州二年十月戊申高開道降己酉楊仲達降己未有星隕於東都十二月己酉瓜州刺史賀拔行威反



四年正月辛巳皇太子伐稽胡二月竇建德陷曹州執孟海公己丑車騎將軍董阿興反於隴州伏誅乙巳太常少卿李仲文謀反伏誅丙午慮囚丁巳赦代州總管府石嶺之北三月進封宜都郡王泰爲衛王庚申慮囚乙酉竇建德陷管州刺史郭志安死之四月壬寅齊王元吉及王世充戰於東都敗績行軍總管盧君諤死之戊申突厥寇并州執漢陽郡王瓌太常卿鄭元璿左驍騎衛大將軍長孫順德甲寅封子元方爲周王元禮鄭王元嘉宋王元則荆王元茂越王丁巳左武衛將軍王君廓敗張青特執之五月壬戌秦王世民敗竇建德於虎牢執之乙丑赦山東爲建德所誣誤者戊辰王世充降庚午周法明降六月庚寅赦河南爲王世充所誣誤者戊戌蔣善合降庚子營州人石世則執其總管晉文衍叛附於靺鞨乙卯臧君相降七月甲子秦王世民俘王世充以獻丙寅竇建德伏誅丁卯大赦給復天下一年陝鼎函號虞芮豳七州二年甲戌劉黑闥反於貝州辛巳戴州刺史孟噉鬼反伏誅八月丙戌朔日有食之丁亥皇太子安撫北境丁酉劉黑闥陷鄆縣魏州刺史權威貝州刺史戴元祥死之癸



卯突厥寇代州執行軍總管王孝基丁未劉黑闥陷歷亭屯衛將軍王行敏死之辛亥深州人崔元遜殺其刺史裴晞叛附於劉黑闥兗州總管徐圓朗反九月盧祖尚降乙卯淳于難降甲子汪華降是秋夔州總管趙郡王孝恭率十二總管兵以討蕭銑十月己丑秦王世民爲天策上將領司徒齊王元吉爲司空庚寅劉黑闥陷瀛州執刺史盧士叡又陷觀州癸卯毛州人董燈明殺其刺史趙元愷乙巳趙郡王孝恭敗蕭銑於荊州執之閏月乙卯如稷州己未幸舊墅壬戌獵於好畤乙丑獵於九變丁卯獵於仲山戊辰獵於清水谷遂幸三原辛未如周氏陂壬申至自周氏陂十一月甲申有事於南郊庚寅李子通降丙申子通謀反伏誅壬寅劉黑闥陷定州總管李玄通死之庚戌杞州人周文舉殺其刺史王孝矩叛附於黑闥十二月乙卯黑闥陷冀州總管麴稜死之甲子左武侯將軍李世勣及黑闥戰於宋州敗績丁卯秦王世民齊王元吉討黑闥己巳黑闥陷邢州庚午陷魏州總管潘道毅死之辛未陷業州壬申徙封元嘉爲徐王

五年正月乙酉劉黑闥陷相州刺史房晃死之丙戌殷恭邃降丁亥濟州別駕  
劉伯通執其刺史竇務本叛附於徐圓朗庚寅東鹽州治中王才藝殺其刺史  
田華叛附於劉黑闥丙申相州人殺其刺史獨孤徹以其州叛附於黑闥己酉  
楊世略劉元進降二月王要漢降己巳秦王世民克邢州丁丑劉黑闥陷洛水  
總管羅士信死之戊寅汴州總管王要漢敗徐圓朗於杞州執周文舉三月戊  
戌譚州刺史李義滿殺齊州都督王薄丁未秦王世民及劉黑闥戰於洛水敗  
之黑闥亡入於突厥蔚州總管高開道反寇易州刺史慕容孝幹死之四月梁  
州野蠶成繭冉安昌降己未甯長真降戊辰釋流罪以下穰麥壬申代州總管  
李大恩及突厥戰死之戊寅鄧文進降五月田留安降庚寅瓜州人王幹殺賀  
拔行威以降乙巳賜荊州今歲田租六月辛亥劉黑闥與突厥寇山東車騎將  
軍元韶爲瓜州道行軍總管以備突厥癸丑吐谷渾寇洮旭疊三州岷州總管  
李長卿敗之乙卯淮安郡王神通討徐圓朗七月甲申作弘義宮甲午淮陽郡  
王道玄爲河北道行軍總管討劉黑闥貝州人董該以定州叛附於黑闥丙申

突厥殺劉武周於白道遷州人鄧士政反執其刺史李敬昂丁酉馮盎降八月辛亥葬隋煬帝甲寅吐谷渾寇岷州益州道行臺左僕射竇軌敗之乙卯突厥寇邊庚申皇太子出豳州道秦王世民出秦州道以禦突厥己巳吐谷渾陷洮州并州總管襄邑郡王神符及突厥戰於汾東敗之戊寅突厥陷大震關九月癸巳靈州總管楊師道敗之於三觀山丙申洪州總管宇文歆又敗之於崇岡壬寅定州總管雙士洛驃騎將軍魏道仁又敗之於恆山之陽丙午領軍將軍安興貴又敗之於甘州劉黑闥陷瀛州刺史馬匡武死之東鹽州人馬君德以其州叛附於黑闥十月己酉齊王元吉討黑闥癸丑貝州刺史許善護及黑闥戰於鄆縣死之甲寅觀州刺史劉君會叛附於黑闥乙丑淮陽郡王道玄及黑闥戰於下博死之己巳林士弘降十一月庚辰劉黑闥陷滄州甲申皇太子討黑闥丙申如宜州癸卯獵於富平北原十二月丙辰獵於萬壽原戊午劉黑闥陷恆州刺史王公政死之庚申至自萬壽原壬申皇太子及劉黑闥戰於魏州敗之甲戌又敗之於毛州

六年正月己卯黑闥將葛德威執黑闥以降壬午舊州人王摩娑反驃騎將軍衛彥討之庚寅徐圓朗陷泗州二月劉黑闥伏誅庚戌幸溫湯壬子獵於驪山甲寅至自溫湯丙寅行軍總管李世勣敗徐圓朗執之三月苗海潮梅知巖左難當降乙巳洪州總管張善安反四月己酉吐蕃陷芳州己未以故第爲通義宮祭元皇帝元貞皇后於舊寢赦京城賜從官帛辛酉張善安陷孫州執總管王戎丁卯南州刺史龐孝泰反陷南越州壬申封子元璿爲蜀王元慶漢王癸酉裴寂爲尙書左僕射蕭瑀爲右僕射封德彝爲中書令吏部尙書楊恭仁兼中書令檢校涼州諸軍事五月庚寅吐谷渾党項寇河州刺史盧士良敗之癸卯高開道以奚寇幽州長史王說敗之六月丁卯突厥寇朔州總管高滿政敗之曲赦朔州七月丙子沙州別駕竇伏明反殺其總管賀若懷廓己亥皇太子屯於北邊秦王世民屯於并州以備突厥八月壬子淮南道行臺左僕射輔公柝反乙丑趙郡王孝恭討之九月壬辰秦王世民爲江州道行軍元帥丙申渝州人張大智反十月丙午殺廣州都督劉世讓戊申降死罪流以下原之己未

如華陰張大智降庚申獵於白鹿原壬戌右虞候率杜士遠殺高滿政以朔州反丁卯突厥請和十一月壬午張善安襲殺黃州總管周法明丁亥如華陰辛卯獵於沙苑丁酉獵於伏龍原十二月壬寅朔日有食之癸卯張善安降庚戌以奉義監爲龍躍宮武功宅爲慶善宮甲寅至自華陰

七年正月庚寅鄒州人鄧同穎殺其刺史李士衡二月丁巳釋奠於國學己未漁陽部將張金樹殺高開道以降三月戊戌趙郡王孝恭敗輔公祏執之己亥孝恭殺越州都督闕稜四月庚子大赦班新律令給復江州道二年揚越一年五月丙戌作仁智宮六月辛丑如仁智宮壬戌慶州都督楊文幹反七月己巳突厥寇朔州總管秦武通敗之癸酉慶州人殺楊文幹以降甲午至自仁智宮舊州地震山崩遏江水閏月己未秦王世民齊王元吉屯於豳州以備突厥八月己巳吐谷渾寇鄯州驃騎將軍彭武傑死之戊寅突厥寇綏州刺史劉大俱敗之壬辰突厥請和丁酉裴寂使於突厥十月丁卯如慶善宮辛未獵於鄂南癸酉幸終南山丙子謁樓觀老子祠庚寅獵於圍川十二月丁卯如龍躍宮戊



辰獵於高陵庚午至自高陵太子詹事裴矩檢校侍中

八年二月癸未慮囚四月甲申如鄠獵於甘谷作太和宮丙戌至自鄠六月甲子如太和宮七月丙午至自太和宮丁巳秦王世民屯於蒲州以備突厥八月壬申并州行軍總管張瑾及突厥戰於太谷敗績鄆州都督張德政死之執行軍長史溫彥博甲申任城郡王道宗及突厥戰於靈州敗之丁亥突厥請和十月辛巳如周氏陂獵於北原壬午如龍躍宮十一月辛卯如宜州獵於西原裴矩罷庚子講武於同官天策府司馬宇文士及權檢校侍中辛丑徙封元疇爲吳王元慶陳王癸卯秦王世民爲中書令齊王元吉爲侍中癸丑獵於華池北原十二月辛酉至自華池庚辰獵於鳴犢泉辛巳至自鳴犢泉

九年正月甲寅裴寂爲司空二月庚申齊王元吉爲司徒壬午有星孛於胃昴丁亥孛於卷舌三月庚寅幸昆明池習水戰壬辰至自昆明池丙午如周氏陂乙卯至自周氏陂丁巳突厥寇涼州都督長樂郡王幼良敗之四月辛巳廢浮屠老子法六月丁巳太白經天庚申秦王世民殺皇太子建成齊王元吉大赦



復浮屠老子法癸亥立秦王世民爲皇太子聽政賜爲父後者襲勳爵赤牒官  
得爲真免民逋租宿賦己卯太白晝見庚辰幽州都督廬江郡王瑗反伏誅癸  
未赦幽州管內爲瑗所誑誤者七月辛卯楊恭仁罷太子右庶子高士廉爲侍  
中左庶子房玄齡爲中書令蕭瑀爲尙書左僕射癸巳宇文士及爲中書令封  
德彝爲尙書左僕射辛亥太白晝見甲寅太白晝見八月丙辰突厥請和丁巳  
太白晝見壬戌吐谷渾請和甲子皇太子卽皇帝位貞觀三年太上皇徙居大  
安宮九年五月崩於垂拱前殿年七十一諡曰大武廟號高祖上元元年改諡  
神堯皇帝天寶八載諡神堯大聖皇帝十三載增諡神堯大聖大光孝皇帝  
贊曰自古受命之君非有德不王自夏后氏以來始傳以世而有賢有不肖故  
其爲世數亦或短或長論者乃謂周自后稷至於文武積功累仁其來也遠故  
其爲世尤長然考於世本夏商周皆出於黃帝夏自鯀以前商自契至於成湯  
其間寂寥無聞與周之興異矣而漢亦起於亭長叛亡之徒及其興也有天下  
皆數百年而後已由是言之天命豈易知哉然考其終始治亂顧其功德有厚

薄與其制度紀綱所以維持者何如而其後世或寢以隆昌或遽以壞亂或漸以陵遲或能振而復起或遂至於不可支持雖各因其勢然有德則興無德則絕豈非所謂天命者常不顯其符而俾有國者兢兢以自勉耶唐在周隋之際世雖貴矣然烏有所謂積功累仁之漸而高祖之興亦何異因時而特起者歟雖其有治有亂或絕或微然其有天下年幾三百可謂盛哉豈非人厭隋亂而蒙德澤繼以太宗之治制度紀綱之法後世有以憑藉扶持而能永其天命歟

唐書卷一

唐書卷一考證

高祖紀元吉爲姑臧公中軍隸焉○舊書無此句當以新書爲正

武德二年閏月辛丑竇建德殺宇文文化及於聊城○舊書在二月丁丑

五年正月丙申相州人殺其刺史獨孤徹以其州叛附於黑闥○臣西按上文

乙酉劉黑闥已陷相州矣此州名疑有誤

六年二月丙寅李世勣敗徐圓朗執之○臣西按圓朗傳云夜亡爲野人所殺

今云執之似誤

四月封子元璿爲蜀王○臣西按高祖諸王傳漢王元軌是年封蜀王元璿當

作元軌

九年四月辛巳○舊書作五月沈炳震曰按六月丁巳朔則五月不應有辛巳

當從新書

年七十一○舊書作七十沈炳震曰自周天和元年丙戌至貞觀九年乙未止

七十當從舊書

唐書卷一考證

唐書卷一考證

唐書卷一考證

唐書卷一考證

唐書卷一考證

唐書卷一考證

唐書卷一考證

唐書卷一考證

唐書卷一考證

唐書卷一考證

唐書卷一考證

唐書卷一考證

唐書卷一考證

唐書卷一考證

唐書卷二

宋 翰 林 學 士 歐 陽 修 撰

本紀第二

太宗文武大聖大廣孝皇帝諱世民高祖次子也母曰太穆皇后竇氏生而不驚方四歲有書生謁高祖曰公在相法貴人也然必有貴子及見太宗曰龍鳳之姿天日之表其年幾冠必能濟世安民書生已辭去高祖懼其語泄使人追殺之而不知其所往因以爲神乃採其語名之曰世民大業中突厥圍煬帝鴈門煬帝從圍中以木繫詔書投汾水而下募兵赴援太宗時年十六往應募隸將軍雲定興謂定興曰虜敢圍吾天子者以爲無援故也今宜先後吾軍爲數十里使其晝見旌旗夜聞鉦鼓以爲大至則可不擊而走之不然知我虛實則勝敗未可知也定興從之軍至崞縣突厥候騎見其軍來不絕果馳告始畢可汗曰救兵大至矣遂引去高祖擊歷山飛陷其圍中太宗馳輕騎取之而出遂奮擊大破之太宗爲人聰明英武有大志而能屈節下士時天下已亂盜賊起

知隋必亡乃推財養士結納豪傑長孫順德劉弘基等皆因事亡命匿之又與晉陽令劉文靜尤善文靜坐李密事繫獄太宗夜就獄中見之與圖大事時百姓避賊多入城城中幾萬人文靜爲令久知其豪傑因共部署計已定乃因裴寂告高祖高祖初不許已而許之高祖已起兵建大將軍府太宗率兵徇西河斬其郡丞高德儒拜右領軍大都督封燉煌郡公唐兵西將至霍邑會天久雨糧且盡高祖謀欲還兵太原太宗諫曰義師爲天下起也宜直入咸陽號令天下今還守一城是爲賊爾高祖不納太宗哭於軍門高祖驚召問之對曰還則衆散於前而敵乘於後死亡須臾所以悲爾高祖寤曰起事者汝也成敗惟汝時左軍已先返卽與隴西公建成分追之夜半太宗失道入山谷棄其馬步而及其兵與俱還高祖乃將而前遲明至霍邑宋老生不出太宗從數騎傳其城舉鞭指麾若將圍之者老生怒出背城陣高祖率建成居其東太宗及柴紹居其南老生兵薄東陣建成墜馬老生乘之高祖軍却太宗自南原馳下坂分兵斷其軍爲二而出其陣後老生兵敗走遂斬之進次涇陽擊胡賊劉鷄子破之



唐兵攻長安太宗屯金城坊攻其西北遂克之義寧元年爲光祿大夫唐國內  
史徙封秦國公食邑萬戶薛舉攻扶風太宗擊敗之斬首萬餘級遂略地至隴  
右二年爲右元帥徙封趙國公率兵十萬攻東都不克而還設三伏於三王陵  
敗隋將段達兵萬人武德元年爲尙書令右翊衛大將軍進封秦王薛舉寇涇  
州太宗爲西討元帥進位雍州牧七月太宗有疾諸將爲舉所敗八月太宗疾  
間復屯於高墪城相持六十餘日已而舉死其子仁杲率其衆求戰太宗按軍  
不動久之仁杲糧盡衆稍離叛太宗曰可矣乃遣行軍總管梁實柵淺水原仁  
杲將宗羅睺擊實太宗遣將軍龐玉救實玉軍幾敗太宗亟兵出其後羅睺敗  
走太宗追之至其城下仁杲乃出降師還高祖遣李密馳傳勞之於豳州密見  
太宗不敢仰視退而歎曰真英主也獻捷太廟拜右武侯大將軍太尉使持節  
陝東道大行臺尙書令詔蒲陝河北諸總管兵皆受其節度二年正月鎮長春  
宮進拜左武侯大將軍涼州總管是時劉武周據并州宋金剛陷滄州王行本  
據蒲州而夏縣人呂崇茂殺縣令以應武周高祖懼詔諸將棄河東以守關中

太宗以爲不可棄願得兵三萬可以破賊高祖於是悉發關中兵益之十一月出龍門關屯於柏壁三年四月擊敗宋金剛於柏壁金剛走介州太宗追之一日夜馳二百里宿於雀鼠谷之西原軍士皆饑太宗不食者二日行至浩州乃得食而金剛將尉遲敬德尋相等皆來降劉武周懼奔於突厥其將楊伏念舉并州降高祖遣蕭瑀卽軍中拜太宗益州道行臺尙書令七月討王世充敗之於北邨四年二月竇建德率兵十萬以援世充太宗敗建德於虎牢執之世充乃降六月凱旋太宗被金甲陳鐵騎一萬介士三萬前後鼓吹獻俘於太廟高祖以謂太宗功高古官號不足以稱乃加號天策上將領司徒陝東道大行臺尙書令位在王公上增邑戶至三萬賜袞冕金輅雙璧黃金六千斤前後鼓吹九部之樂班劍四十人五年正月討劉黑闥於洛州敗之黑闥旣降已而復反高祖怒命太子建成取山東男子十五以上悉阮之毆其小弱婦女以寶關中太宗切諫以爲不可遂已加拜左右十二衛大將軍七年突厥寇邊太宗與遇於豳州從百騎與其可汗語乃盟而去八年進位中書令初高祖起太原非其

本意而事出太宗及取天下破宋金剛王世充竇建德等太宗功益高而高祖  
屢許以爲太子太子建成懼廢與齊王元吉謀害太宗未發九年六月太宗以  
兵入玄武門殺太子建成及齊王元吉高祖大驚乃以太宗爲皇太子八月甲  
子卽皇帝位於東宮顯德殿遣裴寂告於南郊大赦武德流人還之賜文武官  
勳爵免關內及蒲芮虞秦陝鼎六州二歲租給復天下一年民八十以上賜粟  
帛百歲加版授廢潼關以東瀕河諸關癸酉放宮女三千餘人丙子立妃長孫  
氏爲皇后癸未突厥寇便橋乙酉及突厥頡利盟於便橋九月壬子禁私家妖  
神淫祀占卜非龜易五兆者十月丙辰朔日有食之癸亥立中山郡王承乾爲  
皇太子庚辰蕭瑀陳叔達罷十一月庚寅降宗室郡王非有功者爵爲縣公十  
二月癸酉慮囚是歲進封子長沙郡王恪爲漢王宜陽郡王祐楚王

貞觀元年正月乙酉改元辛丑燕郡王李藝反於涇州伏誅二月丁巳詔民男  
二十女十五以上無夫家者州縣以禮聘娶貧不能自行者鄉里富人及親戚  
資送之鰥夫六十寡婦五十婦人有子若守節者勿彊三月癸巳皇后親蠶丙

午詔齊僕射崔季舒黃門侍郎郭遵尚書右丞封孝琰以極言蒙難季舒子剛  
遵子雲孝琰子君遵並及淫刑宜免內侍褻敘以官閏月癸丑朔日有食之四  
月癸巳涼州都督長樂郡王幼良有罪伏誅五月癸丑勅中書令侍中朝堂受  
訟辭有陳事者悉上封六月辛丑封德彝薨甲辰太子少師蕭瑀爲尚書左僕  
射是夏山東旱免今歲租七月壬子吏部尚書長孫無忌爲尚書右僕射八月  
河南隴右邊州霜宇文士及檢校涼州都督戊戌貶高士廉爲安州大都督九  
月庚戌朔日有食之辛酉遣使諸州行損田賑問下戶御史大夫杜淹檢校吏  
部尚書參議朝政宇文士及罷辛未幽州都督王君廓奔於突厥十月丁酉以  
歲饑減膳十一月己未許子弟年十九以下隨父兄之官所十二月壬午蕭瑀  
罷戊申利州都督李孝常右武衛將軍劉德裕謀反伏誅

二年正月辛亥長孫無忌罷兵部尚書杜如晦檢校侍中總監東宮兵馬事癸  
丑吐谷渾寇岷州都督李道彥敗之丁巳徙封恪爲蜀王泰越王祐燕王庚午  
刑部尚書李靖檢校中書令二月戊戌外官上考者給祿三月戊申朔日有食

之壬子命中書門下五品以上及尙書議決死罪壬戌李靖爲關內道行軍大  
總管以備薛延陀己巳遣使巡關內出金寶贖饑民鬻子者還之庚午以旱蝗  
責躬大赦癸酉兩四月己卯瘞隋人暴骸壬寅朔方人梁洛仁殺梁師都以降  
六月甲申詔出使官稟食其家庚寅以子治生賜是日生子者粟辛卯辰州刺  
史裴虔通以弑隋煬帝削爵流驩州七月戊申萊州刺史牛方裕絳州刺史薛  
世良廣州長史唐奉義虎牙郎將高元禮以字文化及之黨皆除名徙於邊八  
月甲戌省冤獄於朝堂辛丑立二王後廟置國官九月壬子以有年賜酺三日  
十月庚辰杜淹薨戊子殺瀛州刺史盧祖尙十一月辛酉有事於南郊十二月  
壬辰黃門侍郎王珪守侍中癸巳禁五品以上過市

三年正月丙午以旱避正殿癸丑官得上下考者給祿一年戊午享於太廟癸  
亥耕籍田辛未裴寂罷二月戊寅房玄齡爲尙書左僕射杜如晦爲右僕射尙  
書右丞魏徵爲祕書監參預朝政三月己酉慮囚四月乙亥太上皇徙居於大  
安宮甲午始御太極殿戊戌賜孝義之家粟五斛八十以上二斛九十以上三

斛百歲加絹二匹婦人正月以來產子者粟一斗五月乙丑周王元方薨六月  
戊寅以旱慮囚己卯大風拔木壬午詔文武官言事八月己巳朔日有食之丁  
亥李靖爲定襄道行軍大總管以伐突厥九月丁巳華州刺史柴紹爲勝州道  
行軍總管以伐突厥十一月庚申并州都督李世勳爲通漠道行軍總管華州  
刺史柴紹爲金河道行軍總管任城郡王道宗爲大同道行軍總管幽州都督  
衛孝節爲恆安道行軍總管營州都督薛萬淑爲暢武道行軍總管以伐突厥  
十二月癸未杜如晦罷閏月癸丑爲死兵者立浮屠祠辛酉慮囚是歲中國人  
歸自塞外及開四夷爲州縣者百二十餘萬人

四年正月丁卯朔日有食之癸巳武德殿北院火二月己亥幸温湯甲辰李靖  
及突厥戰於陰山敗之丙午至自温湯甲寅大赦賜酺五日御史大夫温彥博  
爲中書令王珪爲侍中民部尙書戴胄檢校吏部尙書參豫朝政太常卿蕭瑀  
爲御史大夫與宰臣參議朝政丁巳以旱詔公卿言事三月甲午李靖俘突厥  
頡利可汗以獻四月戊戌西北君長請上號爲天可汗六月乙卯發卒治洛陽



宮七月甲子朔日有食之癸酉蕭瑀罷甲戌太上皇不豫廢朝辛卯疾愈賜都督刺史文武官及民年八十以上孝子表門閭者有差八月甲寅李靖爲尙書右僕射九月庚午瘞長城南隋人暴骨己卯如隴州壬午禁芻牧於古明君賢臣烈士之墓者十月壬辰赦岐隴二州免今歲租賦降咸陽始平武功死罪以下辛卯獵於貴泉谷甲辰獵於魚龍川獻獲於大安宮乙卯免武功今歲租賦十一月壬戌右衛大將軍侯君集爲兵部尙書參議朝政甲子至自隴州戊寅除鞭背刑十二月甲辰獵於鹿苑乙巳至自鹿苑是歲天下斷死罪者二十九人

五年正月癸酉獵於昆明池丙子至自昆明池獻獲於大安宮二月己酉封弟元裕爲鄜王元名譙王靈夔魏王元祥許王元曉密王庚戌封子愔爲梁王貞漢王暉鄴王洽晉王慎申王囂江王簡代王四月壬辰代王簡薨五月乙丑以金帛購隋人沒於突厥者以還其家八月甲辰遣使高麗祭隋人戰亡者戊申殺大理丞張蘊古十一月丙子有事於南郊十二月丁亥詔決死刑京師五覆

奏諸州三覆奏其日尙食毋進酒肉壬寅幸温湯癸卯獵於驪山賜新豐高年帛戊申至自温湯癸丑赦關內

六年正月乙卯朔日有食之癸酉靜州山獠反右武衛將軍李子和敗之三月侯君集罷戊辰如九成宮丁丑降雍岐豳三州死罪以下賜民八十以上粟帛五月魏徵檢校侍中六月己亥鄴王元亨薨辛亥江王鸞薨七月己巳詔天下行鄉飲酒九月己酉幸慶善宮十月侯君集起復乙卯至自慶善宮十二月辛未慮囚縱死罪者歸其家是歲諸羌內屬者三十萬人

七年正月戊子斥字文化及黨人之子孫勿齒辛丑賜京城酺三日二月丁卯雨土三月戊子王珪罷庚寅魏徵爲侍中五月癸未如九成宮六月辛亥戴胄薨八月辛未東西洞獠寇邊右屯衛大將軍張士貴爲龔州道行軍總管以討之九月縱囚來歸皆赦之十月庚申至自九成宮乙丑京師地震十一月壬辰開府儀同三司長孫無忌爲司空十二月甲寅幸芙蓉園丙辰獵於少陵原戊午至自少陵原

八年正月辛丑張士貴及獠戰敗之壬寅遣使循省天下二月乙巳皇太子加元服丙午降死罪以下賜五品以上子爲父後者爵一級民酺三日三月庚辰如九成宮五月辛未朔日有食之是夏吐谷渾寇涼州左驍衛大將軍段志玄爲西海道行軍總管左驍衛將軍樊興爲赤水道行軍總管以伐之七月隴右山崩八月甲子有星孛於虛危十月作永安宮甲子至自九成宮十一月辛未李靖罷己丑吐谷渾寇涼州執行人鴻臚丞趙德楷十二月辛丑特進李靖爲西海道行軍大總管侯君集爲積石道行軍總管任城郡王道宗爲鄯善道行軍總管膠東郡公道彥爲赤水道行軍總管涼州都督李大亮爲且末道行軍總管利州刺史高甑生爲鹽澤道行軍總管以伐吐谷渾丁卯從太上皇闕武於城西

九年正月党項羌叛二月長孫無忌罷三月庚辰洮州羌殺刺史孔長秀附於吐谷渾壬午大赦乙酉高甑生及羌人戰敗之閏四月丙寅朔日有食之五月長孫無忌起復庚子太上皇崩皇太子聽政壬子李靖及吐谷渾戰敗之七月

庚子鹽澤道行軍副總管劉德敏及羌人戰敗之十月庚寅葬太武皇帝於獻陵十一月壬戌特進蕭瑀參豫朝政

十年正月甲午復聽政癸丑徙封元景爲荊王元昌漢王元禮徐王元嘉韓王元則彭王元懿鄭王元軌霍王元鳳號王元慶道王靈夔燕王恪吳王泰魏王祐齊王惜蜀王暉蔣王貞越王慎紀王三月癸丑出諸王爲都督六月壬申溫彥博爲尙書右僕射太常卿楊師道爲侍中魏徵罷爲特進知門下省事參議朝章國典己卯皇后崩十一月庚寅葬文德皇后於昭陵十二月蕭瑀罷庚辰慮囚

十一年正月丁亥徙封元裕爲鄧王元名舒王庚子作飛仙宮乙卯免雍州今歲租賦二月丁巳營九峻山爲陵賜功臣密戚陪塋地及祕器甲子如洛陽宮乙丑給民百歲以上侍五人壬午獵於鹿臺嶺三月丙戌朔日有食之癸卯降洛州囚見徒免一歲租調辛亥獵於廣成澤癸丑如洛陽宮六月甲寅溫彥博薨丁巳幸明德宮己未以諸王爲世封刺史戊辰以功臣爲世封刺史己巳徙

封元祥爲江王七月癸未大雨水穀洛溢乙未詔百官言事壬寅廢明德宮之  
玄圃院賜遭水家丙午給亳州老子廟兗州孔子廟戶各二十以奉享復涼武  
昭王近墓戶二十以守衛九月丁亥河溢壞陝州河北縣毀河陽中潭幸白司  
馬坂觀之賜瀕河遭水家粟帛十月癸丑賜先朝謀臣武將及親戚亡者塋陪  
獻陵十一月辛卯如懷州乙未獵於濟源麥山丙午如洛陽宮十二年正月乙  
未叢州地震癸卯松州地震二月癸亥如河北縣觀底柱甲子巫州獠反夔州  
都督齊善行敗之乙丑如陝州丁卯觀鹽池庚午如蒲州甲戌如長春宮免朝  
邑今歲租賦降囚罪乙亥獵於河濱閏月庚辰朔日有食之丙戌至自長春宮  
七月癸酉吏部尙書高士廉爲尙書右僕射八月壬寅吐蕃寇松州侯君集爲  
當彌道行軍大總管率三總管兵以伐之九月辛亥闊水道行軍總管牛進達  
及吐蕃戰於松州敗之十月己卯獵於始平賜高年粟帛乙未至自始平鈞州  
山獠反桂州都督張寶德敗之十一月己巳明州山獠反交州都督李道彥敗  
之十二月辛巳壁州山獠反右武侯將軍上官懷仁討之是歲滁豪二州野蠶

成繭

十三年正月乙巳拜獻陵赦三原及行從免縣人今歲租賦賜宿衛陵邑郎將  
三原令爵一級丁未至自獻陵二月庚子停世封刺史三月乙丑有星孛於畢  
昴四月戊寅如九成宮甲申中郎將阿史那結社率反伏誅壬寅雲陽石然五  
月甲寅以旱避正殿詔五品以上言事減膳罷役理囚賑乏乃雨六月丙申封  
弟元嬰爲滕王八月辛未朔日有食之十月甲申至自九成宮十一月辛亥楊  
師道爲中書令戊辰尙書左丞劉洎爲黃門侍郎參知政事十二月壬申侯君  
集爲交河道行軍大總管以伐高昌乙亥封子福爲趙王壬辰獵於咸陽癸巳  
至自咸陽是歲滁州野蠶成繭

十四年正月庚子有司讀時令甲寅幸魏王泰第赦雍州長安縣免延康里今  
歲租賦二月丁丑觀釋奠於國學赦大理萬年縣賜學官高第生帛壬午幸温  
湯辛卯至自温湯乙未求梁皇侖褚仲都周熊安生沈重陳沈文阿周弘正張  
譏隋何妥劉焯劉炫之後三月羅竇二州獠反廣州總管党仁弘敗之五月壬



寅徙封靈夔爲魯王六月滁州野蠶成繭乙酉大風拔木八月庚午作襄城宮  
癸酉侯君集克高昌九月癸卯赦高昌部及士卒父子犯死葦犯流大功犯徒  
小功總麻犯杖皆原之閏十月乙未如同州甲辰獵於堯山庚戌至自同州十  
一月甲子有事於南郊十二月丁酉侯君集俘高昌王以獻賜酺三日癸卯獵  
於樊川乙巳至自樊川

十五年正月辛巳如洛陽宮次溫湯衛士崔卿刁文懿謀反伏誅三月戊辰如  
襄城宮四月辛卯詔以來歲二月有事於泰山乙未免洛州今歲租還戶故給  
復者加給一年賜民八十以上物惇獨鰥寡疾病不能自存者米二斛慮囚六  
月己酉有星孛於太微丙辰停封泰山避正殿減膳七月丙寅宥周隋名臣及  
忠烈子孫貞觀以後流配者十月辛卯獵於伊闕壬辰如洛陽宮十一月癸酉  
薛延陀寇邊兵部尙書李世勣爲朔州道行軍總管右衛大將軍李大亮爲靈  
州道行軍總管涼州都督李襲譽爲涼州道行軍總管以伐之十二月戊子至  
自洛陽宮庚子命三品以上嫡子事東宮辛丑慮囚甲辰李世勣及薛延陀戰

於諾真水敗之乙巳贈戰亡將士官三轉

十六年正月乙丑遣使安撫西州戊辰募戍西州者前犯流死亡匿聽自首以應募辛未徙天下死罪囚實西州中書舍人岑文本爲中書侍郎專典機密六月戊戌太白晝見七月戊午長孫無忌爲司徒房玄齡爲司空十一月丙辰獵於武功壬戌獵於岐山之陽甲子賜所過六縣高年孤疾氈衾粟帛遂幸慶善宮庚午至自慶善宮十二月癸卯幸溫湯甲辰獵於驪山乙巳至自溫湯

十七年正月戊辰魏徵薨代州都督劉蘭謀反伏誅二月己亥慮囚戊申圖功臣於凌煙閣三月壬子禁送終違令式者丙辰齊王祐反李世勣討之甲子以旱遣使覆囚決獄乙丑齊王祐伏誅給復齊州一年四月乙酉廢皇太子爲庶人漢王元昌侯君集等伏誅丙戌立晉王治爲皇太子大赦賜文武官及五品以上子爲父後者爵一級民八十以上粟帛酺三日丁亥楊師道罷己丑特進蕭瑀爲太子太保李世勣爲太子詹事同中書門下三品庚寅謝承乾之過於太廟癸巳降封魏王泰爲東萊郡王六月己卯朔日有食之壬辰葬隋恭帝甲

午以旱避正殿減膳詔京官五品以上言事丁酉高士廉同中書門下三品平章政事閏月丁巳詔皇太子典左右屯營兵丙子徙封泰爲順陽郡王七月丁酉房玄齡罷八月庚戌工部尙書張亮爲刑部尙書參豫朝政十月丁未建諸州邸於京城丁巳房玄齡起復十一月己卯有事於南郊壬午賜酺三日以涼州獲瑞石赦涼州十二月庚申幸溫湯庚午至自溫湯

十八年正月乙未如鍾官城庚子如鄠壬寅幸溫湯二月己酉如零口乙卯至自零口丁巳給復突厥高昌部人隸諸州者二年四月辛亥如九成宮七月甲午營州都督張儉率幽營兵及契丹奚以伐高麗八月壬子安西都護郭孝恪爲西州道行軍總管以伐焉耆甲子至自九成宮丁卯劉洎爲侍中岑文本爲中書令中書侍郎馬周守中書令九月黃門侍郎褚遂良參豫朝政辛卯郭孝恪及焉耆戰敗之十月辛丑朔日有食之癸卯宴雍州父老於上林苑賜粟帛甲寅如洛陽宮己巳獵於天池十一月戊寅慮囚庚辰遣使巡問鄭汝懷澤四州高年宴賜之甲午張亮爲平壤道行軍大總管李世勳馬周爲遼東道行軍

大總管率十六總管兵以伐高麗十二月壬寅庶人承乾卒戊午李思摩部落  
叛

十九年二月庚戌如洛陽宮以伐高麗癸丑射虎於武德北山乙卯皇太子監  
國於定州丁巳賜所過高年鰥寡粟帛贈比干太師諡忠烈三月壬辰長孫無  
忌攝侍中吏部尚書楊師道攝中書令四月癸卯誓師於幽州大饗軍丁未岑  
文本薨癸亥李世勣克蓋牟城五月己巳平壤道行軍總管程名振克沙卑城  
庚午次遼澤瘞隋人戰亡者乙亥遼東道行軍總管張君乂有罪伏誅丁丑軍  
至馬首山甲申克遼東城六月丁酉克白巖城己未大敗高麗於安市城東南  
山左武衛將軍王君愕死之辛酉賜酺三日七月壬申葬死事官加爵四級以  
一子襲九月癸未班師十月丙午次營州以太牢祭死事者丙辰皇太子迎謁  
於臨渝關戊午次漢武臺刻石紀功十一月癸酉大饗軍於幽州庚辰次易州  
癸未平壤道行軍總管張文幹有罪伏誅丙戌次定州丁亥貶楊師道爲工部  
尚書十二月戊申次并州己未薛延陀寇夏州左領軍大將軍執失思力敗之

庚申殺劉洎

二十年正月辛未夏州都督喬師望及薛延陀戰敗之丁丑遣使二十二人以六條黜陟於天下庚辰赦并州起義時編戶給復三年後附者一年二月甲午從伐高麗無功者皆賜勳一轉庚申賜所過高年鰥寡粟三月己巳至自高麗庚午不豫皇太子聽政己丑張亮謀反伏誅閏月癸巳朔日有食之六月乙亥江夏郡王道宗李世勣伐薛延陀七月辛亥疾愈李世勣及薛延陀戰敗之八月甲子封孫忠爲陳王己巳如靈州庚辰次涇州賜高年鰥寡粟帛丙戌踰隴山關次瓦亭觀牧馬丁亥許陪陵者子孫從葬九月辛卯遣使巡察嶺南甲辰鐵勒諸部請上號爲可汗辛亥靈州地震十月貶蕭瑀爲商州刺史丙戌至自靈州十一月己丑詔祭祀表疏藩客兵馬宿衛行魚契給驛授五品以上官及除解決死罪皆以聞餘委皇太子

二十一年正月壬辰高士廉薨丁酉詔以來歲二月有事於泰山甲寅以鐵勒諸部爲州縣賜京師酺三日慮囚降死罪以下二月丁丑皇太子釋菜於太學

三月戊子左武衛大將軍牛進達爲青丘道行軍大總管李世勣爲遼東道行軍大總管率三總管兵以伐高麗四月乙丑作翠微宮五月戊子幸翠微宮壬辰命百司決事於皇太子庚戌李世勣克南蘇木底城六月丁丑遣使鐵勒諸部購中國人陷沒者七月乙未牛進達克石城丙申作玉華宮庚戌至自翠微宮八月泉州海溢壬戌停封泰山九月丁酉封子明爲曹王十月癸丑褚遂良罷十一月癸卯進封泰爲濮王十二月戊寅左驍衛大將軍契苾何力爲崑丘道行軍大總管率三總管兵以伐龜茲

二十二年正月庚寅馬周薨戊戌幸溫湯己亥中書舍人崔仁師爲中書侍郎參知機務丙午左武衛大將軍薛萬徹爲青丘道行軍大總管以伐高麗長孫無忌檢校中書令知尙書門下省事戊申至自溫湯二月褚遂良起復乙卯見京城父老勞之蠲今歲半租畿縣三之一丁卯詔度遼水有功未酬勳而犯罪者與成官同乙亥幸玉華宮己卯獵於華原流崔仁師於連州三月丁亥赦宜君給復縣人自玉華宮苑中遷者三年四月丁巳松州蠻叛右武侯將軍梁建



方敗之六月丙寅張行成存問河北從軍者家令州縣爲營農丙子薛萬徹及高麗戰於泊灼城敗之七月甲申太白晝見壬辰殺華州刺史李君羨癸卯房玄齡薨八月己酉朔日有食之辛未執失思力伐薛延陀餘部於金山九月庚辰崑丘道行軍總管阿史那社尒及薛延陀餘部處月處密戰敗之己亥褚遂良爲中書令壬寅眉邛雅三州獠反茂州都督張士貴討之十月癸丑至自玉華宮己巳阿史那社尒及龜茲戰敗之十二月辛未降長安萬年徒罪以下閏月癸巳慮囚

二十三年正月辛亥阿史那社尒俘龜茲王以獻三月己未自冬旱至是雨辛酉大赦丁卯不豫命皇太子聽政於金液門四月己亥幸翠微宮五月戊午貶李世勣爲疊州都督己巳皇帝崩于含風殿年五十三庚午奉大行御馬輿還京師禮部尙書于志寧爲侍中太子少詹事張行成兼侍中高季輔兼中書令壬申發喪諡曰文上元元年改諡文武聖皇帝天寶八載諡文武大聖皇帝十三載增諡文武大聖大廣孝皇帝

贊曰甚矣至治之君不世出也禹有天下傳十有六王而少康有中興之業湯有天下傳二十八王而其甚盛者號稱三宗武王有天下傳三十六王而成康之治與宣之功其餘無所稱焉雖詩書所載時有闕略然三代千有七百餘年傳七十餘君其卓然著見於後世者此六七君而已嗚呼可謂難得也唐有天下傳世二十其可稱者三君玄宗憲宗皆不克其終盛哉太宗之烈也其除隋之亂比迹湯武致治之美庶幾成康自古功德兼隆由漢以來未之有也至其牽於多愛復立浮圖好大喜功勤兵於遠此中材庸主之所常爲然春秋之法常責備於賢者是以後世君子之欲成人之美者莫不歎息於斯焉

唐書卷二考證

太宗紀年五十三〇舊書作五十二臣西按太宗生于隋開皇十八年戊午至  
是年己酉乃五十二當從舊書

唐書卷二考證

秋香...

...

...

...

唐書卷三

宋 翰 林 學 士 歐 陽 修 撰

本紀第三

高宗天皇大聖大弘孝皇帝諱治字爲善太宗第九子也母曰文德皇后長孫氏始封晉王貞觀七年遙領并州都督十七年太子承乾廢而魏王泰次當立亦以罪黜乃立子治爲皇太子太宗嘗命皇太子遊觀習射太子辭以非所好願得奉至尊居膝下太宗大喜乃營寢殿側爲別院使太子居之太宗每視朝皇太子常侍觀決庶政二十三年太宗有疾詔皇太子聽政於金液門四月從幸翠微宮太宗崩以羽檄發六府甲士四千衛皇太子入于京師六月甲戌卽皇帝位于柩前大赦賜文武官勳一轉民八十以上粟帛給復雍州及比歲供軍所一年癸未長孫無忌爲太尉癸巳檢校洛州刺史李勣爲開府儀同三司參掌機密八月癸酉河東地震乙亥又震庚辰遣使存問河東給復二年賜壓死者人絹三匹庚寅葬文皇帝于昭陵九月甲寅荆王元景爲司徒吳王恪爲

珍微宋版  
司空乙卯李勣爲尙書左僕射同中書門下三品十一月乙丑晉州地震左翊  
衛郎將高俛伐突厥是冬無雪

永徽元年正月辛丑改元丙午立妃王氏爲皇后張行成爲侍中二月辛卯封  
子孝爲許王上金柅王素節雍王四月己巳晉州地震五月己未太白晝見六  
月高俛及突厥戰于金山敗之庚辰晉州地震詔五品以上言事七月辛酉以  
旱慮囚八月戊辰給五品以上解官充侍者半祿加賜帛庚午降死罪以下九  
月癸卯高俛俘突厥車鼻可汗以獻十月戊辰李勣罷左僕射十一月己未貶  
褚遂良爲同州刺史十二月庚午琰州獠寇邊梓州都督謝萬歲死之

二年正月戊戌開義倉以賑民乙巳黃門侍郎宇文節中書侍郎柳奭同中書  
門下三品乙卯瑤池都督阿史那賀魯叛四月乙丑命有司毋進肉食訖于五  
月七月丁未賀魯寇庭州左武衛大將軍梁建方右驍衛大將軍契苾何力爲  
弓月道行軍總管以伐之八月己巳高季輔爲侍中于志寧爲尙書左僕射張  
行成爲右僕射同中書門下三品己卯白水蠻寇邊左領軍將軍趙孝祖爲郎



州道行軍總管以伐之九月癸卯以同州苦泉牧地賜貧民十月辛卯晉州地震十一月辛酉有事于南郊癸酉禁進犬馬鷹鶻戊寅忻州地震甲申雨木冰是月竇州義州蠻寇邊桂州都督劉伯英敗之趙孝祖及白水蠻戰于羅仵候山敗之十二月乙未太白晝見壬子處月朱邪孤注殺招慰使單道惠叛附于賀魯是冬無雪

三年正月癸亥梁建方及處月戰于牢山敗之甲子以旱避正殿減膳降囚罪徒以下原之己巳褚遂良爲吏部尙書同中書門下三品丙子享于太廟丁亥耕籍田三月辛巳雨土宇文節爲侍中柳奭守中書令四月庚寅趙孝祖及白水蠻戰敗之甲午彭王元則薨是月兵部侍郎韓瑗爲黃門侍郎同中書門下三品五月庚申求齊侍中崔季舒給事黃門侍郎裴澤隋儀同三司豆盧毓御史中丞游楚客子孫官之七月丁巳立陳王忠爲皇太子大赦賜五品以上子爲父後者勳一轉民酺三日九月丙辰求周司沐大夫裴融尙書左丞封孝琰子孫官之是月中書侍郎來濟同中書門下三品十二月癸巳濮王泰薨

四年二月甲申駙馬都尉房遺愛薛萬徹柴令武高陽巴陵公主謀反伏誅殺  
荆王元景吳王恪乙酉流宇文節于桂州戊子廢蜀王愔爲庶人已亥徐王元  
禮爲司徒李勣爲司空四月壬寅以旱慮囚遣使決天下獄減殿中太僕馬粟  
詔文武官言事甲辰避正殿減膳六月己丑太白晝見八月己亥隕石于馮翊  
十有八九月壬戌張行成薨甲戌褚遂良爲尙書右僕射十月庚子幸温湯甲  
辰赦新豐乙巳至自温湯戊申睦州女子陳碩真反婺州刺史崔義玄討之十  
一月庚戌陳碩真伏誅癸丑兵部尙書崔敦禮爲侍中丁巳柳奭爲中書令十  
二月庚子高季輔薨

五年正月丙寅以旱詔文武官朝集使言事三月戊午如萬年宮乙丑次鳳泉  
湯辛未赦岐州及所過徒罪以下六月癸亥柳奭罷丙寅河北大水遣使慮囚  
八月己未詔免麟游岐陽今歲課役岐州及供頓縣半歲九月丁酉至自萬年  
宮十月癸卯築京師羅郭起觀于九門

六年正月壬申拜昭陵赦醴泉及行從免縣今歲租調陵所宿衛進爵一級令

丞加一階癸酉以少牢祭陪葬者甲戌至自昭陵庚寅封子弘爲代王賢潞王  
二月乙巳皇太子加元服降死罪以下賜酺三日五品以上爲父後者勳一轉  
乙丑營州都督程名振左衛中郎將蘇定方伐高麗五月壬午及高麗戰于貴  
端水敗之癸未左屯衛大將軍程知節爲蔥山道行軍大總管以伐賀魯壬辰  
韓瑗爲侍中來濟爲中書令七月乙酉崔敦禮爲中書令是月中書舍人李義  
府爲中書侍郎參知政事九月庚午貶褚遂良爲潭州都督乙酉洛水溢十月  
齊州黃河溢己酉廢皇后爲庶人乙卯立宸妃武氏爲皇后丁巳大赦賜民八  
十以上粟帛十一月己巳皇后見于太廟戊子停諸州貢珠癸巳詔禁吏酷法  
及爲隱名書者是冬皇后殺王庶人

顯慶元年正月辛未廢皇太子爲梁王立代王弘爲皇太子壬申大赦改元賜  
五品以上子爲父後者勳一轉民酺三日八十以上粟帛丙戌禁胡人爲幻戲  
者甲午放宮人三月辛巳皇后親蠶丙戌戶部侍郎杜正倫爲黃門侍郎同中  
書門下三品四月壬寅詔五品以上老疾不以罪者同致仕壬子矩州人謝無

零反伏誅七月癸未崔敦禮爲太子少師同中書門下三品八月丙申崔敦禮薨辛丑程知節及賀魯部歌邏祿處月戰于榆慕谷敗之九月庚辰括州海盜癸未程知節及賀魯戰于恒篤城敗之十一月乙丑以子顯生賜京官朝集使勳一轉自八月霜且雨至於是月是歲龜茲大將羯獵顛附于賀魯左屯衛大將軍楊胄伐之

二年閏正月壬寅如洛陽宮庚戌右屯衛將軍蘇定方爲伊麗道行軍總管以伐賀魯二月癸亥降洛州囚罪徒以下原之免民一歲租調賜百歲以上旣金粟帛庚午封子顯爲周王壬申徙封素節爲郇王三月戊申禁舅姑拜公主父母拜王妃癸丑李義府兼中書令五月丙申幸明德宮七月丁亥如洛陽宮八月丁卯貶韓瑗爲振州刺史來濟爲台州刺史辛未衛尉卿許敬宗爲侍中九月庚寅杜正倫兼中書令十一月戊戌如許州甲辰遣使慮所過州縣囚乙巳獵于潢南壬子講武于新鄭赦鄭州免一歲租賦賜八十以上粟帛其嘗事高祖任佐史者以名聞十二月乙卯如洛陽宮丁巳蘇定方敗賀魯于金牙山執

之丁卯以洛陽宮爲東都

三年正月戊申楊胄及龜茲羯獵顛戰于泥師城敗之二月甲戌至自東都戊寅慮囚六月壬子程名振及高麗戰于赤烽鎮敗之十一月乙酉貶杜正倫爲橫州刺史李義府普州刺史戊子許敬宗權檢校中書令甲午蘇定方俘賀魯以獻戊戌許敬宗爲中書令大理卿辛茂將兼侍中

四年三月壬午岷陵都護阿史那彌射及西突厥真珠葉護戰于雙河敗之四月丙辰于志寧爲太子太師同中書門下三品乙丑黃門侍郎許圜師同中書門下三品戊辰流長孫無忌于黔州于志寧罷五月己卯許圜師爲中書侍郎同中書門下三品丙申兵部尚書任雅相度支尚書盧承慶參知政事戊戌殺涼州都督長史趙持滿七月己丑以旱避正殿壬辰慮囚八月壬子李義府爲吏部尚書同中書門下三品十月丙午皇太子加元服大赦賜五品以上子孫爲父祖後者勳一轉民酺三日閏月戊寅如東都皇太子監國辛巳詔所過供頓免今歲租賦之半賜民八十以上氈衾粟帛十一月丙午許圜師爲左散騎

常侍檢校侍中戊午辛茂將薨癸亥賀魯部悉結闕俟斤都曼寇邊左驍衛大將軍蘇定方爲安撫大使以伐之盧承慶同中書門下三品

五年正月癸卯蘇定方俘都曼以獻甲子如并州己巳次長平賜父老布帛二月丙戌赦并州及所過州縣義旗初嘗任五品以上葬并州者祭之加佐命功臣食別封者子孫二階大將軍府僚佐存者一階民年八十以上版授刺史縣令賜醮三日甲午祠舊宅三月丙午皇后宴親族隣里于朝堂會命婦于內殿賜從官五品以上并州長史司馬勳一轉婦人八十以上版授郡君賜氈衾粟帛己酉講武于城西辛亥左武衛大將軍蘇定方爲神兵道行軍大總管新羅王金春秋爲嶠夷道行軍總管率三將軍及新羅兵以伐百濟四月癸巳如東都五月辛丑作八關宮戊辰定襄都督阿史德樞賓爲沙磧道行軍總管以伐契丹六月庚午朔日有食之七月乙巳廢梁王忠爲庶人丁卯盧承慶罷八月庚辰蘇定方及百濟戰敗之壬午左武衛大將軍鄭仁泰及悉結拔也固僕骨同羅戰敗之癸未赦神兵道大總管以下軍士及其家賜民醮三日十一月戊



成蘇定方俘百濟王以獻甲寅如許州十二月辛未獵于安樂川己卯如東都  
壬午左驍衛大將軍契苾何力爲涇江道行軍大總管蘇定方爲遼東道行軍  
大總管左驍衛將軍劉伯英爲平壤道行軍大總管以伐高麗阿史德樞賓及  
奚契丹戰敗之

龍朔元年正月戊午鴻臚卿蕭嗣業爲扶餘道行軍總管以伐高麗二月乙未  
改元赦洛州四月庚辰任雅相爲涇江道行軍總管契苾何力爲遼東道行軍  
總管蘇定方爲平壤道行軍總管蕭嗣業爲扶餘道行軍總管右驍衛將軍程  
名振爲鏤方道行軍總管左驍衛將軍龐孝泰爲沃沮道行軍總管率三十五  
軍以伐高麗甲午晦日有食之六月辛巳太白經天八月甲戌蘇定方及高麗  
戰于涇江敗之九月癸卯及皇后幸李勣許圜師第壬子徙封賢爲沛王十月  
丁卯獵于陸渾戊辰獵于非山癸酉如東都鄭仁泰爲鐵勒道行軍大總管蕭  
嗣業爲仙峯道行軍大總管左驍衛大將軍阿史那忠爲長岑道行軍大總管  
以伐鐵勒

二年二月甲子大易官名甲戌任雅相薨戊寅龐孝泰及高麗戰于蛇水死之  
三月庚寅鄭仁泰及鐵勒戰于天山敗之乙巳如河北縣辛亥如蒲州癸丑如  
同州四月庚申至自同州辛巳作蓬萊宮六月癸亥禁宗戚獻纂組雕鏤七月  
戊子以子旭輪生滿月大赦賜酺三日右威衛將軍孫仁師爲熊津道行軍總  
管以伐百濟戊戌李義府罷八月壬寅許敬宗爲太子少師同東西臺三品九  
月丁丑李義府起復十月丁酉幸溫湯皇太子監國丁未至自溫湯庚戌西臺  
侍郎上官儀同東西臺三品十一月辛未貶許圜師爲虔州刺史癸酉封子旭  
輪爲殷王是歲右衛將軍蘇海政爲颶海道行軍總管以伐龜茲海政殺崑陵  
都督阿史那彌射

三年正月乙丑李義府爲右相二月減百官一月俸賦雍同等十五州民錢以  
作蓬萊宮乙亥殺駙馬都尉韋正矩庚戌慮囚四月戊子流李義府于嶺州五  
月壬午柳州蠻叛冀州都督長史劉伯英以嶺南兵伐之六月吐蕃攻吐谷渾  
涼州都督鄭仁泰爲青海道行軍大總管以救之八月癸卯有彗星出于左攝

提戊申詔百寮言事遣按察大使于十道九月戊午孫仁師及百濟戰于白江  
敗之十月辛巳詔皇太子五日一至光順門監諸司奏事小事決之十一月甲  
戌兩木冰十二月庚子改明年爲麟德元年降京師雍州諸縣死罪以下壬寅  
安西都護高賢爲行軍總管以伐弓月

麟德元年二月戊子如福昌宮癸卯如萬年宮四月壬午道王元慶薨五月戊申  
許王孝薨丙寅以旱避正殿七月丁未詔以三年正月有事于泰山八月己卯幸  
舊第降萬年縣死罪以下壬午至自萬年宮丁亥司列太常伯劉祥道兼右相  
大司憲竇德玄爲司元太常伯檢校左相十二月丙戌殺上官儀戊子殺庶人  
忠劉祥道罷太子右中護樂彥璋西臺侍郎孫處約同知軍國政事是冬無雪  
二年二月壬午如東都三月甲寅司戎太常伯姜恪同東西臺三品戊午遣使  
慮京師諸司及雍洛二州囚閏月癸酉日有食之是春疎勒弓月吐蕃攻于闐  
西州都督崔智辯左武衛將軍曹繼叔救之四月丙午赦桂廣黔三都督府丙  
寅講武于邙山之陽戊辰左侍極陸敦信檢校右相孫處約樂彥璋罷七月己

丑鄧王元裕薨十月壬戌帶方州刺史劉仁軌爲大司憲兼知政事丁卯如泰山大有年

乾封元年正月戊辰封于泰山庚午禪于社首以皇后爲亞獻壬申大赦改元賜文武官階勳爵民年八十以上版授下州刺史司馬縣令婦人郡縣君七十以上至八十賜古爵一級民酺七日女子百戶牛酒免所過今年租賦給復齊州一年半兗州二年辛卯幸曲阜祠孔子贈太師二月己未如亳州祠老子追號太上天皇帝縣人宗姓給復一年四月甲辰至自亳州庚戌陸敦信罷六月壬寅高麗泉男生請內附右驍衛大將軍契苾何力爲遼東安撫大使率兵援之左金吾衛將軍龐同善營州都督高保爲遼東道行軍總管左武衛將軍薛仁貴左監門衛將軍李謹行爲後援七月乙丑徙封旭輪爲豫王庚午劉仁軌兼右相八月辛丑竇德玄薨丁未殺始州刺史武惟良淄州刺史武懷運九月龐同善及高麗戰敗之十二月己酉李勣爲遼東道行臺大總管率六總管兵以伐高麗

二年正月丁丑以旱避正殿減膳慮囚二月丁酉涪陵郡王愔薨辛丑禁工商乘馬六月乙卯西臺侍郎楊武戴至德東臺侍郎李安期司烈少常伯趙仁本同東西臺三品東臺舍人張文瓘參知政事七月己卯以旱避正殿減膳遣使慮囚八月己丑朔日有食之辛亥李安期罷九月庚申以餌藥皇太子監國辛未李勣及高麗戰于新城敗之是歲嶺南洞獠陷瓊州

總章元年正月壬子劉仁軌爲遼東道副大總管兼安撫大使涇江道行軍總管二月丁巳皇太子釋奠于國學戊寅如九成宮壬午李勣敗高麗克扶餘南蘇木底蒼巖城三月庚寅大赦改元四月乙卯贈顏回太子少師曾參太子少保丙辰有彗星出于五車避正殿減膳撤樂詔內外官言事庚申以太原元從西府功臣爲二等第一功後官無五品者授其子若孫一人有至四品五品者加二階有三品以上加爵三等第二功後官無五品者授其子若孫從六品一人有至五品者加一階六品者二階三品以上爵一等辛巳楊武薨八月癸酉至自九成宮九月癸巳李勣敗高麗王高藏執之十二月丁巳俘高藏以獻丁



卯有事于南郊甲戌姜恪檢校左相司平太常伯闔立本守右相

二年二月辛酉右肅機李敬玄爲西臺侍郎張文瓘爲東臺侍郎同東西臺三品三月丙戌東臺侍郎郝處俊同東西臺三品癸巳皇后親蠶四月己酉如九成宮六月戊申朔日有食之七月癸巳左衛大將軍契苾何力爲烏海道行軍大總管以援吐谷渾九月庚寅括州海溢壬寅如岐州乙巳赦岐州賜高年粟帛十月丁巳至自岐州十一月丁亥徙封旭輪爲冀王改名輪十二月戊申李勣薨是冬無雪

咸亨元年正月丁丑劉仁軌罷二月戊申慮囚丁巳東南有聲若雷三月甲戌大赦改元壬辰許敬宗罷四月癸卯吐蕃陷龜茲撥換城廢安西四鎮己酉李敬玄罷辛亥右威衛大將軍薛仁貴爲邏娑道行軍大總管以伐吐蕃庚午如九成宮雍州大雨雹高麗酋長鉗牟岑叛寇邊左監門衛大將軍高侃爲東州道行軍總管右領軍衛大將軍李謹行爲燕山道行軍總管以伐之六月壬寅朔日有食之七月甲戌以雍華蒲同四州旱遣使慮囚減中御諸廐馬戊子李



敬玄起復薛仁貴及吐蕃戰于大非川敗績八月庚戌以穀貴禁酒丁巳至自  
九成宮甲子趙王福薨丙寅以旱避正殿減膳九月丁丑給復雍華同岐邠隴  
六州一年閏月癸卯皇后以旱請避位甲寅姜恪爲涼州道行軍大總管以伐  
吐蕃十月庚辰詔文武官言事乙未趙仁本罷十二月庚寅復官名是歲大饑  
二年正月乙巳如東都皇太子監國二月辛未遣使存問諸州四月戊子大風  
雨雹六月癸巳以旱慮囚九月地震丙申徐王元禮薨十月丙子求明禮樂之  
士十一月甲午朔日有食之庚戌如許州遣使存問所過疾老鰥寡慮囚十二  
月癸酉獵于昆陽丙戌如東都是歲姜恪爲侍中閻立本爲中書令

三年正月辛丑姚州蠻寇邊太子右衛副率梁積壽爲姚州道行軍總管以伐  
之二月己卯姜恪薨四月壬申校旗于洛水之陰九月癸卯徙封賢爲雍王十  
月己未皇太子監國十一月戊子朔日有食之甲辰至自東都十二月金紫光  
祿大夫致仕劉仁軌爲太子左庶子同中書門下三品

四年正月丙辰鄭王元懿薨四月丙子如九成宮閏五月丁卯禁作簏捕魚營

圈取獸者八月辛丑以不豫詔皇太子聽諸司啓事己酉大風落太廟鴟尾十月壬午闔立本薨乙未以皇太子納妃赦岐州賜酺三日乙巳至自九成宮

上元元年二月壬午劉仁軌爲雞林道行軍大總管以伐新羅三月辛亥朔日有食之己巳皇后親蠶八月壬辰皇帝稱天皇皇后稱天后追尊六代祖宣簡公爲宣皇帝妣張氏曰宣莊皇后五代祖懿王爲光皇帝妣賈氏曰光懿皇后增高祖太宗及后諡大赦改元賜酺三日十一月丙午如東都己酉獵于華山曲武原十二月癸未蔣王憚自殺

二年正月己未給復雍同華岐隴五州一年辛未吐蕃請和二月劉仁軌及新羅戰于七重城敗之三月丁巳天后親蠶四月辛巳天后殺周王顯妃趙氏丙戌以旱避正殿減膳撤樂詔百官言事己亥天后殺皇太子五月戊申追號皇太子爲孝敬皇帝六月戊寅立雍王賢爲皇太子大赦七月辛亥杞王上金兔官削封邑八月庚寅葬孝敬皇帝于恭陵丁酉詔婦人爲宮官者歲一見其親庚子張文瓘爲侍中郝處俊爲中書令劉仁軌爲尙書左僕射戴至德爲右僕

射十月庚辰雍州雨雹壬午有彗星出于角亢

儀鳳元年正月壬戌徙封輪爲相王丁卯納州獠寇邊二月丁亥如汝州温湯遣使慮免汝州輕繫三月癸卯黃門侍郎來恆中書侍郎薛元超同中書門下三品甲辰如東都免汝州今歲半租賜民八十以上帛閏月己巳吐蕃寇鄯廓河芳四州左監門衛中郎將令狐智通伐之乙酉周王顯爲洮河道行軍元帥領左衛大將軍劉審禮等十二總管相王輪爲涼州道行軍元帥領契苾何力等軍以伐吐蕃四月戊申至自東都甲寅中書侍郎李義琰同中書門下三品戊午如九成宮六月癸亥黃門侍郎高智周同中書門下三品七月丁亥有彗星出于東井乙未吐蕃寇疊州八月庚子避正殿減膳撤樂損食粟馬慮囚詔文武官言事甲子停南北中尙梨園作坊減少府雜匠是月青州海盜十月乙未至自九成宮丙午降封郇王素節鄱陽郡王十一月壬申大赦改元庚寅李敬玄爲中書令十二月戊午來恆薛元超爲河南河北道大使

二年正月乙亥耕籍田庚辰京師地震四月太子左庶子張大安同中書門下

三品五月吐蕃寇扶州八月辛亥劉仁軌爲洮河軍鎮守使十月壬辰徙封顯  
爲英王更名哲十二月乙卯募關內河東猛士以伐吐蕃是歲西突厥及吐蕃  
寇安西冬無雪

三年正月丙子李敬玄爲洮河道行軍大總管以伐吐蕃癸未遣使募河南河  
北猛士以伐吐蕃四月丁亥以旱避正殿慮囚戊申大赦改明年爲通乾元年  
癸丑涇州民生子異體連心五月壬戌如九成宮大雨霖九月辛酉至自九成  
宮癸亥張文瓘薨丙寅李敬玄劉審禮及吐蕃戰于青海敗績審禮死之十月  
丙申停劍南隴右歲貢丙午密王元曉薨閏十一月丙申兩木冰壬子來恆薨  
十二月癸丑罷通乾號

調露元年正月戊子如東都庚戌戴至德薨四月辛酉郝處俊爲侍中五月丙  
戌皇太子監國戊戌作紫桂宮六月辛亥大赦改元吏部侍郎裴行儉伐西突  
厥九月壬午行儉敗西突厥執其可汗都支十月突厥温傳奉職二部寇邊單  
于大都護府長史蕭嗣業伐之十一月戊寅高智周罷甲辰禮部尙書裴行儉

爲定襄道行軍大總管以伐突厥

永隆元年二月癸丑如汝州温湯丁巳如少室山乙丑如東都三月裴行儉及突厥戰于黑山敗之四月乙丑如紫桂宮戊辰黃門侍郎裴炎崔知温中書侍郎王德真同中書門下三品五月丁酉太白經天七月己卯吐蕃寇河源辛巳李敬玄及吐蕃戰于湟川敗績左武衛將軍黑齒常之爲河源軍經略大使丙申江王元祥薨突厥寇雲州都督竇懷哲敗之八月丁未如東都丁巳貶李敬玄爲衡州刺史甲子廢皇太子爲庶人乙丑立英王哲爲皇太子大赦改元賜酺三日己巳貶張大安爲普州刺史九月甲申王德真罷十月壬寅降封曹王明爲零陵郡王戊辰至自東都十一月壬申朔日有食之

開耀元年正月乙亥突厥寇原慶二州辛巳賜京官九品以上酺三日癸巳裴行儉爲定襄道行軍大總管以伐突厥己亥減殿中太僕馬省諸方貢獻免雍岐華同四州二歲稅河南河北一年調二月丙午皇太子釋奠于國學三月辛卯郝處俊罷五月乙酉常州人劉龍子謀反伏誅丙戌定襄道副總管曹懷舜



及突厥戰于橫水敗績己丑黑齒常之及吐蕃戰于良非川敗之六月壬子永嘉郡王暉有罪伏誅七月己丑以太平公主下嫁赦京師甲午劉仁軌罷左僕射閏月丁未裴炎爲侍中崔知溫薛元超守中書令庚戌以餌藥皇太子監國庚申裴行儉及突厥戰敗之八月丁卯以河南河北大水遣使賑乏絕室廬壞者給復一年溺死者贈物人三段九月丙申有彗星出于天市壬戌裴行儉俘突厥溫傳可汗阿史那伏念以獻乙丑改元赦定襄軍及諸道緣征官吏兵募十月丙寅朔日有食之十一月癸卯徙庶人賢于巴州

永淳元年二月癸未以孫重照生滿月大赦改元賜酺三日是月突厥車薄咽麪寇邊三月戊午立重照爲皇太孫四月甲子朔日有食之丙寅如東都皇太子監國辛未裴行儉爲金牙道行軍大總管率三總管兵以伐突厥安西副都護王方翼及車薄咽麪戰于熱海敗之丁亥黃門侍郎郭待舉兵部侍郎岑長倩祕書員外少監郭正一吏部侍郎魏玄同與中書門下同承受進止平章事五月乙卯洛水溢六月甲子突厥骨咄祿寇邊嵐州刺史三德茂死之是月大



蝗人相食七月作萬泉宮己亥作奉天宮庚申零陵郡王明自殺九月吐蕃寇  
柘州驍衛郎將李孝逸伐之十月甲子京師地震丙寅黃門侍郎劉齊賢同中  
書門下平章事

弘道元年正月甲午幸奉天宮二月庚午突厥寇定州刺史霍王元軌敗之三  
月庚寅突厥寇單于都護府司馬張行師死之庚子李義琰罷丙午有彗星出  
于五車癸丑崔知溫薨四月己未如東都壬申郭待舉郭正一同中書門下平  
章事甲申綏州部落稽白鐵余寇邊右武衛將軍程務挺敗之五月乙巳突厥  
寇蔚州刺史李思儉死之七月甲辰徙封輪爲豫王改名旦薛元超罷八月乙  
丑皇太子朝于東都皇太孫留守京師丁卯滹沱溢己巳河溢壞河陽城九月  
乙丑以太平公主子生赦東都十月癸亥幸奉天宮十一月戊戌右武衛將軍  
程務挺爲單于道安撫大使以伐突厥辛丑皇太子監國丁未如東都戊申裴  
炎劉齊賢郭正一兼於東宮平章事十二月丁巳改元大赦是夕皇帝崩于貞  
觀殿年五十六諡曰天皇大帝天寶八載改諡天皇大聖皇帝十三載增諡天

皇大聖大弘孝皇帝

贊曰小雅曰赫赫宗周褒姒滅之此周幽王之詩也是時幽王雖亡而太子宜  
臼立是爲平王而詩人乃言滅之者以爲文武之業於是蕩盡東周雖在不能  
復興矣其曰滅者甚疾之之辭也武氏之亂唐之宗室戕殺殆盡其賢士大夫  
不免者十八九以太宗之治其遺德餘烈在人者未遠而幾於遂絕其爲惡豈  
一褒姒之比邪以太宗之明昧於知子廢立之際不能自決卒用昏童高宗溺  
愛衽席不戒履霜之漸而毒流天下貽禍邦家嗚呼父子夫婦之間可謂難哉  
可不慎哉

唐書卷三

唐書卷三考證

高宗紀顯慶二年三月癸丑李義府兼中書令○舊書作甲子沈炳震曰按是月無甲子當從新書

咸亨三年十月己未皇太子監國十一月甲辰至自東都○臣西按二年正月如東都皇太子監國至是月甲辰始書至自東都則自去年至此皆皇太子監國也此處例不應複書豈因舊書之譌未及刪去耶

唐書卷三考證



唐書卷四

宋 翰 命 林 學 太 常 士 國 中 歐 陽 修 撰

本紀第四

則天順聖皇后武氏諱曩并州文水人也父士護官至工部尚書荊州都督封應國公后年十四太宗聞其有色選爲才人太宗崩后削髮爲比丘尼居于感業寺高宗幸感業寺見而悅之復召入宮久之立爲昭儀進號宸妃永徽六年高宗廢皇后王氏立宸妃爲皇后高宗自顯慶後多苦風疾百司奏事時時令后決之常稱旨由是參豫國政后既專寵與政乃數上書言天下利害務收人心而高宗春秋高苦疾后益用事遂不能制高宗悔陰欲廢之而謀洩不果上元元年高宗號天皇皇后亦號天后天下之人謂之二聖弘道元年十二月高宗崩遺詔皇太子卽皇帝位軍國大務不決者兼取天后進止甲子皇太子卽皇帝位尊后爲皇太后臨朝稱制大赦賜九品以下勳官一級庚午韓王元嘉爲太尉霍王元軌爲司徒舒王元名爲司空甲戌劉仁軌爲尚書左僕射裴炎

爲中書令劉齊賢爲侍中同中書門下三品戊寅郭待舉魏玄同岑長倩同中書門下三品癸未郭正一罷

光宅元年正月癸未改元嗣聖癸巳左散騎常侍韋弘敏爲太府卿同中書門下三品二月戊午廢皇帝爲廬陵王幽之己未立豫王旦爲皇帝妃劉氏爲皇后立永平郡王成器爲皇太子大赦改元爲文明賜文武官五品以上爵一等九品以上勳兩轉老人版授官賜粟帛職官五品以上舉所知一人皇太后仍臨朝稱制庚申廢皇太孫重照爲庶人殺庶人賢于巴州甲子皇帝率羣臣上尊號于武成殿丁卯冊皇帝丁丑太常卿王德真爲侍中中書侍郎劉禕之中書門下三品庚辰贈玉清觀道士大中大夫王遠知金紫光祿大夫三月丁亥徙封上金爲畢王素節葛王四月丁巳滕王元嬰薨辛酉徙封上金爲澤王素節許王癸酉遷廬陵王于房州丁丑又遷于均州五月癸巳以大喪禁射獵閏月甲子禮部尙書武承嗣爲太常卿同中書門下三品七月戊午廣州崑崙殺其都督路元叡乙丑突厥寇朔州左武衛大將軍程務挺敗之辛未有彗星



出于西方八月庚寅葬天皇帝于乾陵丙午武承嗣罷九月甲寅大赦改元  
旗幟尚白易內外官服青者以碧大易官名改東都爲神都追尊老子母爲先  
天太后丙辰左威衛大將軍程務挺爲單于道安撫大使以備突厥己巳追尊  
武氏五代祖克己爲魯國公妣裴氏爲魯國夫人高祖居常爲太尉北平郡王  
妣劉氏爲王妃曾祖儉爲太尉金城郡王妣宋氏爲王妃祖華爲太尉太原郡  
王妣趙氏爲王妃考士護爲太師魏王妣楊氏爲王妃丁丑柳州司馬李敬業  
舉兵于揚州以討亂貶韋弘敏爲汾州刺史十月癸未楚州司馬李崇福以山  
陽安宜鹽城三縣歸于敬業甲申左玉鈐衛大將軍梁郡公孝逸爲揚州道行  
軍大總管左金吾衛大將軍李知十爲副率兵三十萬以拒李敬業丁亥左肅  
政臺御史大夫鸞味道檢校內史同鳳閣鸞臺三品鳳閣舍人李景謏同鳳閣  
鸞臺平章事壬辰李敬業克潤州丙申殺裴炎追諡五代祖魯國公曰靖高祖  
北平郡王曰恭肅曾祖金城郡王曰義康祖太原郡王曰安成考魏王曰忠孝  
丁酉曲赦揚楚二州復敬業姓徐氏貶劉齊賢爲辰州刺史李景謏罷右史沈

君諒著作郎崔晉爲正諫大夫同鳳閣鸞臺平章事十一月辛亥左鷹揚衛大將軍黑齒常之爲江南道行軍大總管庚申右監門衛將軍蘇孝祥及徐敬業戰于阿谿死之乙丑徐敬業將王那相殺敬業降丁卯郭待舉罷鸞臺侍郎韋方質爲鳳閣侍郎同鳳閣鸞臺平章事十二月戊子遣御史察風俗癸卯殺程務挺

垂拱元年正月丁未大赦改元庚戌鸞味道守內史戊辰劉仁軌薨二月乙巳春官尙書武承嗣秋官尙書裴居道右肅政臺御史大夫韋思謙同鳳閣鸞臺三品突厥寇邊左玉鈐衛中郎將淳于處平爲陽曲道行軍總管以擊之沈君諒罷三月崔晉罷丙辰遷廬陵王于房州辛酉武承嗣罷辛未頒垂拱格四月丙子貶鸞味道爲青州刺史癸未淳于處平及突厥戰于忻州敗績五月丙午裴居道爲納言丁未流王德真于象州己酉冬官尙書蘇良嗣守納言封皇帝子成義爲恆王壬戌以旱慮囚壬申韋方質同鳳閣鸞臺三品六月天官尙書韋待價同鳳閣鸞臺三品九月丁卯揚州地生毛十一月癸卯韋待價爲燕然

道行軍大總管以擊突厥

二年正月辛酉大赦賜酺三日內外官勳一轉二月辛未朔日有食之三月戊申作銅甌四月庚辰岑長倩爲內史五月丙午裴居道爲內史六月辛未蘇良嗣同鳳閣鸞臺三品己卯韋思謙守納言十月己巳有山出于新豐縣改新豐爲慶山赦囚給復一年賜酺三日十二月免并州百姓庸調終其身是冬無雪三年閏正月丁卯封皇帝子隆基爲楚王隆範衛王隆業趙王二月己亥以旱避正殿減膳丙辰突厥寇昌平黑齒常之擊之三月乙丑韋思謙罷四月辛丑追號孝敬皇帝妃裴氏曰哀皇后葬于恭陵癸丑以旱慮囚命京官九品以上言事壬戌裴居道爲納言五月丙寅夏官侍郎張光輔爲鳳閣侍郎同鳳閣鸞臺平章事庚午殺劉禕之七月丁卯冀州雌雞化爲雄乙亥京師地震兩金于廣州八月壬子魏玄同兼檢校納言交趾人李嗣仙殺安南都護劉延祐據交州桂州司馬曹玄靜敗之是月突厥寇朔州燕然道行軍大總管黑齒常之敗之九月己卯虢州人楊初成自稱郎將募州人迎廬陵王于房州不果見殺十

月庚子右監門衛中郎將爨寶璧及突厥戰敗績十二月壬辰韋待價爲安息道行軍大總管安西大都護闔溫古副之以擊吐蕃是歲大饑

四年正月甲子增七廟立高祖太宗高宗廟于神都庚午毀乾元殿作明堂三月壬戌殺麟臺少監周思茂四月戊戌殺太子通事舍人郝象賢五月庚申得寶圖于洛水乙亥加尊號爲聖母神皇六月丁亥朔日有食之得瑞石于汜水七月丁巳大赦改寶圖爲天授聖圖洛水爲永昌洛水封其神爲顯聖侯加特進禁漁釣改嵩山爲神岳封其神爲天中王太師使持節大都督賜酺五日戊午京師地震八月戊戌神都地震丙午博州刺史瑯邪郡王冲舉兵以討亂遣左金吾衛大將軍丘神勳拒之戊申冲死之庚戌越王貞舉兵于豫州以討亂辛亥曲赦博州九月丙辰左豹韜衛大將軍麴崇裕爲中軍大總管岑長倩爲後軍大總管以拒越王貞張光輔爲諸軍節度削越王貞及瑯邪郡王冲屬籍改其姓爲虺氏貞死之丙寅赦豫州殺韓王元嘉魯王靈夔范陽郡王靄黃國公譟東莞郡公融及常樂公主皆改其姓爲虺氏丁卯左肅政臺御史大夫騫

味道夏官侍郎王本立同鳳閣鸞臺平章事十月辛亥大風拔木十一月辛酉  
殺濟州刺史薛顓及其弟駙馬都尉紹十二月乙酉殺霍王元軌江都郡王緒  
及殿中監裴承光大殺唐宗室流其幼者于嶺南己亥殺騫味道己酉拜洛受  
圖辛亥改明堂爲萬象神宮大赦

永昌元年正月乙卯享于萬象神宮大赦改元賜酺七日丁巳舒王元名爲司  
徒戊午布政于萬象神宮頒九條以訓百官己未朗州雌雞化爲雄二月丁酉  
尊考太師魏忠孝王曰周忠孝太皇置崇先府官戊戌追諡妣楊氏曰周忠孝  
太后太原郡王曰周安成王妣趙氏爲王妃金城郡王曰魏義康王妃宋氏爲  
王妃北平郡王曰趙肅恭王妃劉氏爲王妃五代祖魯國公曰太原靖王夫人  
裴氏爲王妃三月甲子張光輔守納言癸酉天官尙書武承嗣爲納言張光輔  
守內史四月甲辰殺汝南郡王瑋鄱陽郡公諲廣漢郡公謚汶山郡公綦零陵  
郡王俊廣都郡公疇徙其家于雋州己酉殺天官侍郎鄧玄挺五月丙辰韋待  
價及吐蕃戰于寅識迦河敗績己巳白馬寺僧薛懷義爲新平道行軍大總管

以擊突厥七月丁巳流紀王慎于巴州改其姓爲虺氏丙子流韋待價于繡州  
殺閻温古戊寅王本立同鳳閣鸞臺三品八月癸未薛懷義爲新平道中軍大  
總管以擊突厥甲申殺張光輔洛州司馬弓嗣業洛陽令弓嗣明陝州參軍弓  
嗣古流人徐敬真乙未松州雌雞化爲雄辛丑殺陝州刺史郭正一丁未殺相  
州刺史弓志元蒲州刺史弓彭祖尙方監王令基九月庚戌殺恆山郡王承乾  
之子厥閏月甲午殺魏玄同夏官侍郎崔管戊申殺彭州長史劉易從十月癸  
丑殺梁州都督李光誼丁巳殺陝州刺史劉延景戊午殺右武威衛大將軍黑  
齒常之右鷹揚衛將軍趙懷節己未殺嗣鄭王璪丁卯春官尙書范履冰鳳閣  
侍郎邢文偉同鳳閣鸞臺平章事

天授元年正月庚辰大赦改元曰載初以十一月爲正月十二月爲臘月來歲  
正月爲一月以周漢之後爲二王後封舜禹湯之裔爲三恪周隋同列國封其  
嗣乙未除唐宗室屬籍臘月丙寅殺劉齊賢一月戊子王本立罷邢文偉爲內  
史岑長倩武承嗣同鳳閣鸞臺三品鳳閣侍郎武攸寧爲納言甲午流韋方質



于儋州二月丁卯殺地官尙書王本立三月乙酉以旱減膳丁亥蘇良嗣薨五月戊子殺范履冰己亥殺梁郡公孝逸六月戊申殺汴州刺史柳明肅七月辛巳流舒王元名于和州頒大雲經于天下壬午殺豫章郡王亶丁亥殺澤王上金許王素節甲午赦永昌縣癸卯殺太常丞蘇踐言八月辛亥殺許王素節之子璟曾江縣令白令言甲寅殺裴居道壬戌殺將軍阿史那惠右司郎中喬知之癸亥殺尙書右丞張行廉泰州刺史杜儒童甲子殺流人張楚金戊辰殺流人元萬頃苗神客辛未殺南安郡王穎鄴國公昭及諸宗室李直李敞李然李勳李策李越李黯李玄李英李志業李知言李玄貞九月乙亥殺鉅鹿郡公晃麟臺郎裴望及其弟司膳丞璉壬午改國號周大赦改元賜酺七日乙酉加尊號曰聖神皇帝降皇帝爲皇嗣賜姓武氏皇太子爲皇孫丙戌立武氏七廟于神都追尊周文王曰始祖文皇帝妣妣氏曰文定皇后四十代祖平王少子武曰睿祖康皇帝妣姜氏曰康惠皇后太原靖王曰巖祖成皇帝妣曰成莊皇后趙肅恭王曰肅祖章敬皇帝妣曰章敬皇后魏義康王曰烈祖昭安皇帝妣曰

昭安皇后周安成王曰顯祖文穆皇帝妣曰文穆皇后忠孝太皇曰太祖孝明高皇帝妣曰孝明高皇后追封伯父及兄弟之子爲王堂兄爲郡王諸姑姊爲長公主堂姊妹爲郡主司賓御史務滋守納言鳳閣侍郎宗秦客檢校內史給事中傅游藝爲鸞臺侍郎同鳳閣鸞臺平章事十月丁巳給復并州武興縣百姓子孫相承如漢豐沛甲午貶宗秦客爲遵化尉丁卯殺流人韋方質己巳殺許王素節之子瑛琪瓊瓚瑒瑤琛唐臣辛未貶邢文偉爲珍州刺史置大雲寺封周公爲褒德王孔子爲隆道公改唐太廟爲享德廟以武氏七廟爲太廟二年正月甲戌改置社稷旗幟尙赤戊寅殺雅州刺史劉行實及其弟渠州刺史行瑜尙衣奉御行感兄子左鷹揚衛將軍虔通戊子武承嗣爲文昌左相庚寅賜酺乙未殺丘神勳左豹韜衛將軍衛蒲山庚子殺史務滋臘月己未始用周臘四月壬寅朔日有食之丙午大赦五月丁亥大風折木岑長倩爲武威道行軍大總管以擊吐蕃六月庚戌左肅政臺御史大夫格輔元爲地官尙書鸞臺侍郎樂思晦鳳閣侍郎任知古同鳳閣鸞臺平章事七月庚午徙關內七州

戶以實神都八月戊申武攸寧罷夏官尙書歐陽通爲司禮卿兼判納言事庚申殺右玉鈐衛大將軍張虔勗九月乙亥殺岐州刺史雲弘嗣壬辰殺傅游藝癸巳左羽林衛大將軍武攸寧守納言冬官侍郎裴行本洛州司馬狄仁傑爲地官侍郎同鳳閣鸞臺平章事十月己酉殺岑長倩歐陽通格輔元壬戌殺樂思晦左衛將軍李安靜

長壽元年正月戊辰夏官尙書楊執柔同鳳閣鸞臺平章事庚午貶任知古爲江夏令狄仁傑彭澤令流裴行本于嶺南乙亥殺右衛大將軍泉獻誠庚辰司刑卿李游道爲冬官尙書同鳳閣鸞臺平章事二月戊午秋官尙書袁智弘同鳳閣鸞臺平章事四月丙申朔日有食之大赦改元如意五月洛水溢七月又溢八月甲戌河溢壞河陽縣戊寅武承嗣武攸寧楊執柔罷秋官侍郎崔元綜爲鸞臺侍郎夏官侍郎李昭德爲鳳閣侍郎權檢校天官侍郎姚璿爲文昌左丞檢校地官侍郎李元素爲文昌右丞營繕大匠王璿爲夏官尙書司賓卿崔神基同鳳閣鸞臺平章事九月戊戌大霧庚子大赦改元改用九月社賜酺七

日癸卯以并州爲北都癸丑流李遊道袁智弘王璿崔神基李元素于嶺南十月丙戌武威道行軍總管王孝傑敗吐蕃克四鎮

二年臘月癸亥殺皇嗣妃劉氏德妃竇氏丁卯降封皇孫成器爲壽春郡王恆王成義衡陽郡王楚王隆基臨淄郡王衛王隆範巴陵郡王趙王隆業彭城郡王一月庚子夏官侍郎婁師德同鳳閣鸞臺平章事甲寅殺尙方監裴匪躬內常侍范雲仙三月己卯殺左衛員外大將軍阿史那元慶白潤府果毅薛大信五月乙未殺冬官尙書蘇幹相州刺史來同敏癸丑河溢棣州九月丁亥朔日有食之乙未加號金輪聖神皇帝大赦賜酺七日作七寶庚子追尊烈祖昭安皇帝曰渾元昭安皇帝顯祖文穆皇帝曰立極文穆皇帝太祖孝明高皇帝曰無上孝明高皇帝辛丑姚璿罷文昌右丞韋巨源同鳳閣鸞臺平章事秋官侍郎陸元方爲鸞臺侍郎同鳳閣鸞臺平章事司賓卿豆盧欽望守內史

延載元年臘月甲戌突厥默啜寇靈州右鷹揚衛大將軍李多祚敗之一月甲午婁師德爲河源積石懷遠等軍營田大使二月庚午薛懷義爲伐逆道行軍

大總管領十八將軍以擊默啜乙亥以旱慮囚己卯武威道大總管王孝傑及吐蕃戰于冷泉敗之三月甲申鳳閣舍人蘇味道爲鳳閣侍郎同鳳閣鸞臺平章事李昭德檢校內史薛懷義爲朔方道行軍大總管擊默啜昭德爲朔方道行軍長史味道爲司馬四月壬戌常州地震五月甲午加號越古金輪聖神皇帝大赦改元賜酺七日七月癸未嵩嶽山人武什方爲正諫大夫同鳳閣鸞臺平章事八月什方罷戊辰王孝傑爲瀚海道行軍總管己巳司賓少卿姚璿守納言左肅政臺御史大夫楊再思爲鸞臺侍郎洛州司馬杜景佺檢校鳳閣侍郎同鳳閣鸞臺平章事戊寅流崔元綜于振州九月壬午朔日有食之壬寅貶李昭德爲南賓尉十月壬申文昌右丞李元素爲鳳閣侍郎右肅政臺御史中丞周允元檢校鳳閣侍郎同鳳閣鸞臺平章事嶺南獠寇邊容州都督張玄遇爲桂永等州經略大使癸酉雨木冰

天冊萬歲元年正月辛巳加號慈氏越古金輪聖神皇帝改元證聖大赦賜酺三日戊子貶豆盧欽望爲趙州刺史韋巨源鄜州刺史杜景佺溱州刺史蘇味



道集州刺史陸元方綏州刺史丙申萬象神宮火丙午王孝傑爲朔方行軍總管以擊突厥二月己酉朔日有食之壬子殺薛懷義甲子罷慈氏越古號三月丙辰周允元薨四月戊寅建大周萬國頌德天樞七月辛酉吐蕃寇臨洮王孝傑爲肅邊道行軍大總管以擊之九月甲寅祀南郊加號天冊金輪大聖皇帝大赦改元賜酺九日以崇先廟爲崇尊廟

萬歲通天元年臘月甲戌如神岳甲申封于神岳改元曰萬歲登封大赦免今歲租稅賜酺十日丁亥禪于少室山己丑給復洛州二年登封告成縣三年癸巳復于神都一月甲寅婁師德爲肅邊道行軍副總管以擊吐蕃己巳改崇尊廟爲太廟二月辛巳尊神岳天中王爲神岳天中黃帝天靈妃爲天中黃后三月壬寅王孝傑婁師德及吐蕃戰于素羅汗山敗績丁巳復作明堂改曰通天宮大赦改元賜酺七日四月癸酉檢校夏官侍郎孫元亨同鳳閣鸞臺平章事庚子貶婁師德爲原州都督府司馬五月壬子契丹首領松漠都督李盡忠歸誠州刺史孫萬榮陷營州殺都督趙文翽乙丑左鷹揚衛將軍曹仁師右金吾



衛大將軍張玄遇左威衛大將軍李多祚司農少卿麻仁節等擊之七月辛亥  
春官尚書武三思爲榆關道安撫大使納言姚璿爲副以備契丹八月丁酉張  
玄遇曹仁師麻仁節等及契丹戰于黃驛谷敗績執玄遇仁節九月庚子同州  
刺史武攸宜爲清邊道行軍大總管以擊契丹丁巳吐蕃寇涼州都督許欽明  
死之庚申并州長史王方慶爲鸞臺侍郎殿中監李道廣同鳳閣鸞臺平章事  
十月辛卯契丹寇冀州刺史陸寶積死之甲午慮囚

神功元年正月壬戌殺李元素孫元亨洛州錄事參軍綦連耀箕州刺史劉思  
禮知天官侍郎事石抱忠劉奇給事周譖鳳閣舍人王勳前涇州刺史王勔太  
子司議郎路敬淳司門員外郎劉順之右司員外郎宇文全志來庭縣主簿柳  
璆癸亥突厥默啜寇勝州平狄軍副使安道買敗之甲子婁師德守鳳閣侍郎  
同鳳閣鸞臺平章事二月乙巳慮囚三月庚子王孝傑及孫萬斬戰于東碇石  
谷敗績孝傑死之戊申赦河南北四月戊辰置九鼎于通天宮癸酉前益州大  
都督府長史王及善爲內史癸未右金吾衛大將軍武懿宗爲神兵道行軍大

總管及右豹韜衛將軍何迦密以擊契丹五月癸卯婁師德爲清邊道行軍副  
大總管右武衛將軍沙吒忠義爲清邊中道前軍總管以擊契丹六月丁卯殺  
監察御史李昭德司僕少卿來俊臣己卯尙方少監宗楚客同鳳閣鸞臺平章  
事戊子特進武承嗣春官尙書武三思同鳳閣鸞臺三品辛卯婁師德安撫河  
北七月丁酉武承嗣武三思罷八月丙戌姚璿罷九月壬寅大赦改元賜酺七  
日庚戌婁師德守納言十月甲子給復徇忠立節二縣一年閏月甲寅檢校司  
刑卿幽州都督狄仁傑爲鸞臺侍郎司刑卿杜景佺爲鳳閣侍郎同鳳閣鸞臺  
平章事

聖曆元年正月甲子大赦改元賜酺九日丙寅宗楚客罷丁亥李道廣罷三月  
己巳召廬陵王于房州戊子廬陵王至自房州四月庚寅赦神都及河北辛丑  
婁師德爲隴右諸軍大使檢校河西營田事五月庚午禁屠六月乙卯大風拔  
木七月辛未杜景佺罷八月突厥寇邊戊子左豹韜衛將軍閻知微降于突厥  
寇邊甲午王方慶罷庚子春官尙書武三思檢校內史狄仁傑兼納言司屬卿

武重規爲天兵中道大總管沙吒忠義爲天兵西道前軍總管幽州都督張仁  
亶爲天兵東道總管左羽林衛大將軍李多祚右羽林衛大將軍閻敬容爲天  
兵西道後軍總管以擊突厥癸丑突厥寇蔚州乙卯寇定州刺史孫彥高死之  
九月甲子夏官尙書武攸寧同鳳閣鸞臺三品戊辰突厥寇趙州長史唐波若  
降于突厥刺史高璿死之突厥寇相州沙吒忠義爲河北道前軍總管將軍陽  
基副之李多祚爲後軍總管大將軍富福信爲奇兵總管以禦之壬申立廬陵  
王顯爲皇太子大赦賜酺五日甲戌皇太子爲河北道行軍元帥以擊突厥戊  
寅狄仁傑爲河北道行軍副元帥檢校納言辛巳試天官侍郎蘇味道爲鳳閣  
侍郎同鳳閣鸞臺平章事十月癸卯狄仁傑爲河北道安撫大使夏官侍郎姚  
元崇麟臺少監李嶠同鳳閣鸞臺平章事族閭知微

二年正月壬戌封皇嗣旦爲相王臘月戊子左肅政臺御史中丞吉頊爲天官  
侍郎檢校右肅政臺御史中丞魏元忠爲鳳閣侍郎同鳳閣鸞臺平章事辛亥  
賜皇太子姓武氏大赦一月庚申武攸寧罷二月己丑如緱氏辛卯如嵩陽丁

西復于神都三月甲戌以隋唐爲二王後婁師德爲納言四月壬辰魏元忠檢校并州大都督府長史天兵軍大總管婁師德副之以備突厥辛丑婁師德爲隴右諸軍大使甲辰慮囚七月丙辰神都大雨洛水溢八月庚子王及善爲文昌左相同鳳閣鸞臺平章事太子宮尹豆盧欽望爲文昌右相同鳳閣鸞臺三品楊再思罷丁未試天官侍郎陸元方爲鸞臺侍郎同鳳閣鸞臺平章事婁師德薨戊申武三思爲內史九月乙亥如福昌縣曲赦戊寅復于神都庚辰王及善薨是秋黃河溢十月丁亥吐蕃首領贊婆來

久視元年正月戊午貶吉頊爲琰川尉壬申武三思罷臘月辛巳封皇太子之子重潤爲邵王庚寅陸元方罷司禮卿阿史那斛瑟羅爲平西軍大總管丁酉狄仁傑爲內史庚子文昌左相韋巨源爲納言乙巳如嵩山一月丁卯如汝州温湯戊寅復于神都作三陽宮二月乙未豆盧欽望罷三月癸丑夏官尙書唐奉一爲天兵中軍大總管以備突厥四月戊申如三陽宮五月己酉朔日有食之癸丑大赦改元罷天冊金輪大聖號賜酺五日給復告成縣一年閏七月戊

寅復于神都已丑天官侍郎張錫爲鳳閣侍郎同鳳閣鸞臺平章事李嶠罷丁酉吐蕃寇涼州隴右諸軍州大使唐休璟敗之于洪源谷八月庚戌魏元忠爲隴右諸軍州大總管以擊吐蕃庚申斂天下僧錢作大像九月辛丑狄仁傑薨十月辛亥魏元忠爲蕭關道行軍大總管以備突厥甲寅復唐正月大赦丁巳韋巨源罷文昌右丞韋安石爲鸞臺侍郎同鳳閣鸞臺平章事丁卯如新安隴澗山曲赦壬申復于神都十二月甲寅突厥寇隴右

長安元年正月丁丑改元大足二月己酉鸞臺侍郎李懷遠同鳳閣鸞臺平章事三月丙申流張錫于循州四月丙午大赦癸丑姚元崇檢校并州以北諸軍州兵馬五月乙亥如三陽宮丁丑魏元忠爲靈武道行軍大總管以備突厥丙申天官侍郎顧琮同鳳閣鸞臺平章事六月庚申夏官侍郎李迥秀同鳳閣鸞臺平章事辛未赦告成縣七月甲戌復于神都乙亥揚楚常潤蘇五州地震壬午蘇味道按察幽平等州兵馬甲申李懷遠罷九月壬申殺邵王重潤及永泰郡主主壻武延基十月壬寅如京師辛酉大赦改元給復關內三年賜酺三日

丙寅魏元忠同鳳閣鸞臺三品十一月壬申武三思罷戊寅改含元宮爲大明宮

二年正月突厥寇鹽州三月丙戌李迥秀安置山東軍馬檢校武騎兵庚寅突厥寇并州雍州長史薛季昶持節山東防禦大使以備之七月甲午突厥寇代州八月辛亥劍南六州地震九月乙丑朔日有食之壬申突厥寇忻州己卯吐蕃請和十月甲辰顧琮薨戊申吐蕃寇悉州茂州都督陳大慈敗之甲寅姚元崇同鳳閣鸞臺平章事蘇味道韋安石李迥秀同鳳閣鸞臺三品十一月甲子相王旦爲司徒戊子祀南郊大赦賜酺三日十二月甲午魏元忠爲安東道安撫使

三年三月壬戌朔日有食之四月庚子相王旦罷吐蕃來求婚乙巳以旱避正殿閏月庚午成均祭酒李嶠同鳳閣鸞臺平章事己卯李嶠知納言事七月壬寅正諫大夫朱敬則同鳳閣鸞臺平章事庚戌檢校涼州都督唐休璟爲夏官尙書同鳳閣鸞臺平章事八月乙酉京師大雨雹九月庚寅朔日有食之丁酉



貶魏元忠爲高要尉十月丙寅如神都十二月丙戌天下置關三十

四年正月丁未作興泰宮壬子天官侍郎韋嗣立爲鳳閣侍郎同鳳閣鸞臺三品三月癸亥貶李迥秀爲廬州刺史壬申朱敬則罷三月丁亥進封皇孫平恩郡王重福爲譙王己亥夏官侍郎宗楚客同鳳閣鸞臺平章事貶蘇味道爲坊州刺史四月壬戌韋安石知納言事李嶠知內史事丙子如興泰宮赦壽安縣給復一年五月丁亥大風拔木六月辛酉姚元之罷乙丑天官侍郎崔玄暉爲鸞臺侍郎同鳳閣鸞臺平章事丁丑李嶠同鳳閣鸞臺三品壬午相王府長史姚元之兼知夏官尙書同鳳閣鸞臺三品七月丙戌左肅政臺御史大夫楊再思守內史甲午復于神都貶宗楚客爲原州都督八月庚申唐休璟兼幽營二州都督安東都護九月壬子姚元之爲靈武道行軍大總管十月辛酉元之爲靈武道安撫大使甲戌判秋官侍郎張柬之同鳳閣鸞臺平章事壬午懷州長史房融爲正諫大夫同鳳閣鸞臺平章事十一月丁亥天官侍郎韋承慶行鳳閣侍郎同鳳閣鸞臺平章事李嶠罷十二月丙辰韋嗣立罷

五年正月壬午大赦庚寅禁屠癸卯張柬之崔玄暉及左羽林衛將軍敬暉檢校左羽林衛將軍桓彥範司刑少卿袁恕己左羽林衛將軍李湛薛思行趙承恩右羽林衛將軍楊元琰左羽林衛大將軍李多祚職方郎中崔泰之庫部員外郎朱敬則司刑評事冀仲甫檢校司農少卿兼知總監翟世言內直郎王同皎率左右羽林兵以討亂麟臺監張易之春官侍郎張昌宗汴州刺史張昌期司禮少卿張同休通事舍人張景雄伏誅丙午皇帝復于位丁未徙后于上陽宮戊申上后號曰則天大聖皇帝十一月崩諡曰大聖則天皇后唐隆元年改爲天后景雲元年改爲大聖天后延和元年改爲天后聖帝未幾改爲聖后開元四年改爲則天皇后天寶八載加諡則天順聖皇后

中宗大和大聖大昭孝皇帝諱顯高宗第七子也母曰則天順聖皇后武氏高宗崩以皇太子卽皇帝位而皇太后臨朝稱制嗣聖元年正月廢居于均州又遷于房州聖曆二年復爲皇太子太后老且病神龍元年正月張柬之等以羽林兵討亂甲辰皇太子監國大赦改元丙午復于位大赦賜文武官階爵民酺

五日免今歲租賦給復房州三年放宮女三千人相王旦爲安國相王太尉同鳳閣鸞臺三品庚戌張柬之袁恕己同鳳閣鸞臺三品崔玄暉守內史敬暉爲納言桓彥範守納言二月甲寅復國號唐貶韋承慶爲高要尉流房融于高州楊再思同中書門下三品姚元之罷甲子皇后韋氏復于位大赦賜酺三日復宗室死于周者官爵丙寅太子賓客武三思爲司空同中書門下三品貶譙王重福爲濮州刺史丁卯右散騎常侍駙馬都尉武攸暨爲司徒辛未安國相王旦罷甲戌太子少詹事祝欽明同尚書門下三品韋安石罷進封子義興郡王重俊爲衛王北海郡王重茂溫王丁丑武三思武攸暨罷三月甲申詔文明後破家者昭洗之還其子孫蔭己丑袁恕己守中書令四月辛亥桓彥範爲侍中袁恕己爲中書令丁卯高要尉魏元忠爲衛尉卿同中書門下平章事辛未敬暉爲侍中甲戌魏元忠崔玄暉刑部尚書韋安石爲吏部尚書太子右庶子李懷遠爲左散騎常侍涼州都督唐休璟爲輔國大將軍同中書門下三品乙亥張柬之爲中書令五月壬午遷武氏神主于崇恩廟乙酉立太廟社稷于東都

戊子復周隋二王後壬辰進封兄成紀郡王千里爲成王甲午敬暉桓彥範張  
柬之袁恕己崔玄暉罷韋安石兼檢校中書令魏元忠兼侍中甲辰唐休璟爲  
尚書左僕射特進豆盧欽望爲尚書右僕射同中書門下三品六月壬子左驍  
衛大將軍裴思諒爲靈武道行軍大總管以備突厥癸亥韋安石爲中書令魏  
元忠爲侍中楊再思檢校中書令豆盧欽望平章軍國重事七月辛巳太子賓  
客韋巨源同中書門下三品甲辰洛水溢八月戊申給復河南洛陽二縣一年  
壬戌追冊妃趙氏爲皇后乙亥祔孝敬皇帝于東都太廟皇后見于廟丁丑幸  
洛城南門觀鬪象九月壬午祀天地于明堂大赦賜文武官勳爵民爲父後者  
古爵一級酺三日癸巳韋巨源罷十月癸亥幸龍門乙丑獵于新安辛未魏元  
忠爲中書令楊再思爲侍中十一月戊寅上尊號曰應天皇帝皇后曰順天皇  
后壬午及皇后享于太廟大赦賜文武官階勳爵民酺三日己丑幸洛城南門  
觀潑寒胡戲壬寅皇太后崩廢崇恩廟

二年正月戊戌吏部尚書李嶠同中書門下三品中書侍郎于惟謙同中書門

下平章事閏月丙午公主開府置官屬二月乙未禮部尚書韋巨源爲刑部尚書同中書門下三品丙申遣十道巡察使三月甲辰韋安石罷戶部尚書蘇瓌守侍中戊申唐休璟罷庚戌殺光祿卿駙馬都尉王同皎是月置員外官四月己丑李懷遠罷己亥兩毛于鄆縣辛丑洛水溢五月庚申葬則天大聖皇后六月戊寅貶敬暉爲崖州司馬桓彥範瀧州司馬袁恕己竇州司馬崔玄暉白州司馬張柬之新州司馬七月戊申立衛王重俊爲皇太子丙寅魏元忠爲尚書右僕射兼中書令李嶠守中書令辛未左散騎常侍致仕李懷遠同中書門下三品流敬暉于嘉州桓彥範于瀧州袁恕己于環州崔玄暉于古州張柬之于瀧州八月丙子貶祝欽明爲申州刺史九月戊午李懷遠薨十月癸巳蘇瓌爲侍中戊戌至自東都十一月乙巳大赦賜行從官勳一轉十二月己卯靈武軍大總管沙吒忠義及突厥戰于鳴沙敗績丙戌以突厥寇邊京師旱河北水減膳罷土木工蘇瓌存撫河北丙申魏元忠爲尚書左僕射

景龍元年正月丙辰以旱慮囚二月丙戌復武氏廟陵置令丞守戶如昭陵甲

午襄德廟榮先陵置令丞四月庚寅赦雍州五月戊戌右屯衛大將軍張仁亶  
爲朔方道行軍大總管以備突厥丙午假鴻臚卿臧思言使于突厥死之以旱  
避正殿減膳六月丁卯朔日有食之庚午雨土于陝州戊子吐蕃及姚州蠻寇  
邊姚儁道討擊使唐九徵敗之七月辛丑皇太子以羽林千騎兵誅武三思不  
克死之癸卯大赦壬戌李嶠爲中書令八月丙戌上尊號曰應天神龍皇帝皇  
后曰順天翊聖皇后魏元忠罷九月丁酉吏部侍郎蕭至忠爲黃門侍郎兵部  
尚書宗楚客左衛將軍兼太府卿紀處訥同中書門下三品于惟謙罷庚子大  
赦改元賜文武官階勳爵辛亥楊再思爲中書令章巨源紀處訥爲侍中蘇瓌  
罷十月戊寅殺習藝館內教蘇安恆壬午有彗星出于西方十二月乙丑朔日  
有食之丁丑雨土

二年二月癸未有星隕于西南庚寅大赦進五品以上母妻封號二等無妻者  
授其女婦人八十以上版授郡縣鄉君七月癸巳朔方道行軍大總管張仁亶  
同中書門下三品丁酉有星孛于胃昴十一月庚申西突厥寇邊御史中丞馮



嘉賓使于突厥死之己卯大赦賜酺三日癸未安西都護牛師獎及西突厥戰于火燒城死之是歲皇后妃主昭容賣官行墨勅斜封

三年二月己丑及皇后幸玄武門觀宮女拔河爲宮市以嬉壬寅韋巨源爲尙書左僕射楊再思爲右僕射同中書門下三品壬子及皇后幸太常寺三月戊午宗楚客爲中書令蕭至忠守侍中太府卿韋嗣立守兵部尙書同中書門下三品中書侍郎兼檢校吏部侍郎崔湜守兵部侍郎趙彥昭爲中書侍郎同中書門下平章事戊寅禮部尙書韋溫爲太子少保同中書門下三品太常少卿鄭愔守吏部侍郎同中書門下平章事五月丙戌貶崔湜爲灤州刺史鄭愔江州司馬六月癸巳太白晝見庚子以旱避正殿減膳撤樂詔括天下圖籍壬寅慮囚癸卯楊再思薨七月丙辰西突厥娑葛降辛酉許婦人非緣夫子封者蔭其子孫癸亥慮囚庚辰澧水溢八月乙酉李嶠同中書門下三品特進韋安石爲侍中壬辰有星孛于紫宮九月戊辰吏部尙書蘇瓌爲尙書左僕射同中書門下三品十一月乙丑有事于南郊以皇后爲亞獻大赦賜文武官階爵入品

者減考免關內今歲賦賜酺三日甲戌豆盧欽望薨十二月壬辰前宋國公致仕唐休璟爲太子少師同中書門下三品甲午如新豐温湯甲辰赦新豐給復一年賜從官勳一轉乙巳至自新豐

四年正月丙寅及皇后微行以觀燈遂幸蕭至忠第丁卯微行以觀燈幸韋安石長寧公主第己卯如始平二月壬午赦咸陽始平給復一年癸未至自始平庚戌及后妃公主觀三品以上拔河三月以河源九曲子吐蕃庚申兩木冰井溢五月辛酉封嗣號王邕爲汧王丁卯殺許州司兵參軍燕欽融丁丑剡縣地震六月皇后及安樂公主散騎常侍馬秦客反壬午皇帝崩年五十五諡曰孝和皇帝天寶十三年加諡大和大聖大昭孝皇帝

贊曰昔者孔子作春秋而亂臣賊子懼其於弑君篡國之主皆不黜絕之豈以其盜而有之者莫大之罪也不沒其實所以著其大惡而不隱歟自司馬遷班固皆作高后紀呂氏雖非篡漢而盜執其國政遂不敢沒其實豈其得聖人之意歟抑亦偶合於春秋之法也唐之舊史因之列武后于本紀蓋其所從來遠

矣夫吉凶之於人猶影響也而爲善者得吉常多其不幸而罹於凶者有矣爲惡者未始不及於凶其幸而免者亦時有焉而小人之慮遂以爲天道難知爲善未必福而爲惡未必禍也武后之惡不及於大戮所謂幸免者也至中宗韋氏則禍不旋踵矣然其親遭母后之難而躬自蹈之所謂下愚之不移者歟

唐書卷四

...

...

...

...

...

...

...

唐書卷四考證

則天紀五代祖克己高祖居常○舊書外戚傳五代祖名居常高祖名克己

久視元年正月戊午貶吉頊爲琰川尉○頊本傳貶在是年十月臣酉按表久

視元年三月甲戌吉頊加左控宦內供奉若正月已貶不應三月猶加官也  
當以本傳爲是

長安元年十一月壬申武三思罷○沈炳震曰按三思久視元年正月已罷矣  
此重出誤

唐書卷四考證

卷之四

世產出

皇元庚午十一月壬申朔二日... ○沈... ○本...

... ○本... ○本... ○本...

... ○本... ○本... ○本...

...



唐書卷五

宋 翰 林 學 士 歐 陽 修 撰

本紀第五

睿宗玄真大聖大興孝皇帝諱旦高宗第八子也始封殷王領冀州大都督單于大都護長而溫恭好學通詁訓工草隸書徙封豫王又封冀王累遷右金吾衛大將軍洛州牧徙封相王復封豫王武后廢中宗立爲皇帝其改國號周以爲皇嗣居于東宮中宗自房州還復爲皇太子武后封皇嗣爲相王授太子右衛率累遷右羽林衛大將軍并州牧安北大都護諸道元帥中宗復位進號安國相王

景雲元年六月壬午韋皇后弑中宗矯詔立溫王重茂爲皇太子以刑部尚書裴談工部尚書張錫同中書門下三品吏部尚書張嘉福中書侍郎岑羲吏部侍郎崔湜同中書門下平章事發諸府兵五萬屯京師以韋溫總知內外兵馬甲申乃發喪又矯遺詔自立爲皇太后皇太子卽皇帝位以睿宗參謀政事大

赦改元曰唐隆太后臨朝攝政罷睿宗參謀政事以爲太尉封嗣雍王守禮爲  
邠王壽春郡王成器宋王丁亥温王妃陸氏爲皇后壬辰紀處訥張嘉福岑羲  
持節巡撫關內河南北庚子臨淄郡王隆基率萬騎兵入北軍討亂誅韋氏安  
樂公主及韋巨源馬秦客駙馬都尉武延秀光祿少卿楊均辛丑睿宗奉皇帝  
御安福門大赦賜文武官階勳爵免天下歲租之半進封隆基爲平王朝邑尉  
劉幽求爲中書舍人苑總監鍾紹京爲中書侍郎參知機務壬寅紹京及黃門  
侍郎李日知同中書門下三品紀處訥韋温宗楚客將作大匠宗晉卿司農卿  
趙履温伏誅貶汴王邕爲沁州刺史蕭至忠許州刺史韋嗣立宋州刺史趙彥  
昭絳州刺史崔湜華州刺史癸卯太白晝見平王隆基同中書門下三品鍾紹  
京行中書令張嘉福伏誅甲辰安國相王卽皇帝位于承天門大赦長流長任  
及流人未達者還之賜內外官階爵復重茂爲温王乙巳鍾紹京罷丙午太常  
少卿薛稷爲黃門侍郎參豫機務丁未立平王隆基爲皇太子復則天大聖皇  
后號曰天后戊申許州刺史姚元之爲兵部尙書同中書門下三品韋嗣立蕭

至忠爲中書令趙彥昭爲中書侍郎崔湜爲吏部侍郎同中書門下平章事七月庚戌進封衡陽郡王成義爲申王巴陵郡王隆範岐王彭城郡王隆業薛王癸丑兵部尙書崔日用爲黃門侍郎參預機務丁巳洛州長史宋璟檢校吏部尙書同中書門下三品岑義罷壬戌貶蕭至忠爲晉州刺史韋嗣立許州刺史趙彥昭宋州刺史張錫絳州刺史崔湜罷丙寅貶李嶠爲懷州刺史姚元之兼中書令蘇瓌爲尙書左僕射丁卯唐休璟張仁亶罷己巳大赦改元賜內外官及子爲父後者勳一轉崔日用薛稷罷乙亥廢崇恩廟昊陵順陵追廢皇后韋氏爲庶人安樂公主爲悖逆庶人八月庚寅譙王重福及汴州刺史鄭愔反伏誅癸巳罷墨勅斜封官貶裴談爲蒲州刺史九月辛未太子少師致仕唐休璟爲朔方道行軍大總管以備突厥十月乙未追號天后曰大聖天后癸卯出義宗于太廟十一月戊申姚元之爲中書令己酉葬孝和皇帝于定陵壬子蘇瓌韋安石罷宋王成器爲尙書左僕射丁卯赦靈駕所過己巳宋王成器爲司徒二年正月己未太僕卿郭元振中書侍郎張說同中書門下平章事甲子徙封

重茂爲襄王乙丑追冊妃劉氏竇氏爲皇后二月丁丑皇太子監國甲申貶姚  
元之爲申州刺史宋璟楚州刺史丙戌太子少保韋安石爲侍中劉幽求罷復  
墨勅斜封官辛卯禁屠三月癸丑作金仙玉真觀四月甲申韋安石爲中書令  
宋王成器罷辛卯李日知爲侍中壬寅大赦賜文武官階勳爵民酺三日甲辰  
作玄元皇帝廟五月庚戌復吳陵順陵置官屬壬戌殿中監竇懷貞爲左御史  
臺大夫同中書門下平章事八月乙卯大赦賜酺三日丁巳皇太子釋奠于國  
學庚午韋安石爲尙書左僕射同中書門下三品九月乙亥竇懷貞爲侍中十  
月甲辰吏部尙書劉幽求爲侍中右散騎常侍魏知古太子詹事崔湜爲中書  
侍郎同中書門下三品中書侍郎陸象先同中書門下平章事韋安石李日知  
郭元振竇懷貞張說罷十二月丁未作潑寒胡戲

先天元年正月辛未享于太廟甲戌并汾絳三州地震辛巳有事于南郊戊子  
耕籍田己丑大赦改元曰太極賜內外官階爵民酺五日版授九十以上下州  
刺史八十以上上州司馬辛卯幸安福門觀酺三日夜壬辰陸象先同中書門

下三品乙未戶部尙書岑羲左御史臺大夫竇懷貞同中書門下三品二月丁巳皇太子釋奠于國學是春旱五月戊寅有事于北郊辛巳大赦改元曰延和賜內外官陪禮者勳一轉民醜五日六月癸丑岑羲爲侍中乙卯追號大聖天后爲天后聖帝辛酉刑部尙書郭元振爲朔方道行軍大總管以伐突厥甲子幽州都督孫佺左武衛將軍李楷洛左威衛將軍周以悌及奚戰于冷陁山敗績七月辛未有彗星入于太微兵部尙書李迥秀爲朔方道後軍大總管乙亥竇懷貞爲尙書右僕射平章軍國重事己卯幸安福門觀樂三日而止丙戌以旱減膳八月庚子立皇太子爲皇帝以聽小事自尊爲太上皇以聽大事壬寅追號天后聖帝爲聖后甲辰大赦改元賜內外官及五品以上子爲父後者勳爵民醜五日丁未立皇太子妃王氏爲皇后戊申封皇帝子嗣直爲剡王嗣謙鄧王己酉宋王成器爲司徒庚戌竇懷貞爲尙書左僕射劉幽求守尙書右僕射同中書門下三品魏知古爲侍中崔湜檢校中書令戊午流劉幽求于封州九月丁卯朔日有食之甲午封皇帝子嗣昇爲陝王十月辛卯獵于驪山十一

月丁亥詔遣皇帝巡邊甲午幽州都督宋璟爲左軍大總管并州長史薛訥爲中軍大總管兵部尙書郭元振爲右軍大總管

二年正月乙亥吏部尙書蕭至忠爲中書令二月追作先天元年醮六日辛丑以兩霖避正殿減膳丙辰郭元振同中書門下三品七月甲子大赦乙丑詔歸政于皇帝開元四年六月崩于百福殿年五十五諡曰天聖真皇帝天寶十三載增諡玄真大聖大興孝皇帝

玄宗至道大聖大明孝皇帝諱隆基睿宗第三子也母曰昭成皇后竇氏性英武善騎射通音律曆象之學始封楚王後爲臨淄郡王累遷衛尉少卿潞州別駕景龍四年朝于京師遂留不遣庶人韋氏已弑中宗矯詔稱制玄宗乃與太平公主薛崇簡尙衣奉御王崇暉公主府典籤王師虔朝邑尉劉幽求苑總監鍾紹京長上折衝麻嗣宗押萬騎果毅葛福順李仙鶴道士馮處澄僧普潤定策討亂或請先啓相王玄宗曰請而從是王與危事不從則吾計失矣乃夜率幽求等入苑中福順仙鶴以萬騎兵攻玄武門斬左羽林將軍韋播中郎將



高嵩以徇左萬騎由左入右萬騎由右入玄宗率總監羽林兵會兩儀殿梓宮宿衛兵皆起應之遂誅韋氏黎明馳謁相王謝不先啓相王泣曰賴汝以免不然吾且及難乃拜玄宗殿中監兼知內外閑廐檢校隴右羣牧大使押左右萬騎進封平王同中書門下三品睿宗卽位立爲皇太子景雲二年監國聽除六品以下官延和元年星官言帝坐前星有變睿宗曰傳德避災吾意決矣七月壬辰制皇太子宜卽皇帝位太子惶懼入請睿宗曰此吾所以答天戒也皇太子乃御武德殿除三品以下官八月庚子卽皇帝位先天元年十月庚子享于太廟大赦

開元元年正月辛巳皇后親蠶七月甲子太平公主及岑羲蕭至忠竇懷貞謀反伏誅乙丑始聽政丁卯大赦賜文武官階爵庚午流崔湜于竇州甲戌毀天樞乙亥尙書右丞張說檢校中書令庚辰陸象先罷八月癸巳劉幽求爲尙書右僕射知軍國大事壬寅宋王成器爲太尉申王成義爲司徒邠王守禮爲司空九月丙寅宋王成器罷庚午劉幽求同中書門下三品張說爲中書令十月

姚薈蠻寇姚州都督李蒙死之己亥幸温湯癸卯講武于驪山流郭元振于新州給事中唐紹伏誅免新豐來歲稅賜從官帛甲辰獵于渭川同州刺史姚元之爲兵部尙書同中書門下三品乙巳至自渭川十一月乙丑劉幽求兼侍中戊子羣臣上尊號曰開元神武皇帝十二月庚寅大赦改元賜內外官勳改中書省爲紫微省門下省爲黃門省侍中爲監甲午吐蕃請和己亥禁潑寒胡戲壬寅姚崇兼紫微令癸丑劉幽求罷貶張說爲相州刺史甲寅黃門侍郎盧懷慎同紫微黃門平章事

二年正月壬午以關內旱求直諫停不急之務寬繫囚祠名山大川葬暴骸甲申并州節度大使薛訥同紫微黃門三品以伐契丹二月壬辰避正殿減膳徹樂突厥寇北庭都護郭虔瓘敗之己酉慮囚三月己亥磧西節度使阿史那獻執西突厥都擔四月辛未停諸陵供奉鷹犬五月辛亥魏知古罷六月京師大風拔木甲子以太上皇避暑徙御大明宮七月乙未焚錦繡珠玉于前殿戊戌禁采珠玉及爲刻鏤器玩珠繩帖縉服者廢織錦坊庚子薛訥及奚契丹戰于

灤河敗績丁未襄王重茂薨追冊爲皇帝八月壬戌禁女樂乙亥吐蕃寇邊薛  
訥攝左羽林軍將軍爲隴右防禦大使右驍衛將軍郭知運爲副以伐之九月  
庚寅作興慶宮丁酉宴京師侍老于含元殿庭賜九十以上几杖八十以上鳩  
杖婦人亦如之賜於其家戊申幸溫湯十月戊午至自溫湯甲子薛訥及吐蕃  
戰于武階敗之十二月乙丑封子嗣真爲鄜王嗣初鄂王嗣玄野王

三年正月丁亥立郢王嗣謙爲皇太子降死罪流以下原之賜酺三日癸卯盧  
懷慎檢校黃門監二月辛酉赦囚非惡逆造僞者四月庚申突厥部三姓葛邏  
祿來附右羽林軍大將軍薛訥爲源州鎮軍大總管涼州都督楊執一副之右  
衛大將軍郭虔瓘爲朔州鎮軍大總管并州長史王峻副之以備突厥五月丁  
未以旱錄京師囚戊申避正殿減膳七月庚辰朔日有食之十月辛酉壽州蠻  
寇邊右驍衛將軍李玄道伐之壬戌薛訥爲朔方道行軍大總管太僕卿呂延  
祚靈州刺史杜賓客副之癸亥如郿赦所過徒罪以下賜侍老九十以上及篤  
疾者物甲子如鳳泉湯戊辰降大理繫囚罪十一月己卯至自鳳泉湯乙酉幸

温湯丁亥相州人崔子岳反伏誅甲午至自温湯乙未禁白衣長髮會十二月乙丑降鳳泉湯所過死罪以下

四年正月戊寅朝太上皇于西宮二月丙辰幸温湯辛酉吐蕃寇松州廓州刺史蓋思貴伐之丁卯至自温湯癸酉松州都督孫仁獻及吐蕃戰敗之六月甲子太上皇崩辛未京師華陝二州大風拔木癸酉大武軍子將郝靈佺殺突厥默啜七月丁丑吐蕃請和丁酉洛水溢八月辛未奚契丹降十月庚午葬大聖真皇帝于橋陵十一月己卯盧懷慎罷丁亥遷中宗于西廟丙申尙書左丞源乾曜爲黃門侍郎同紫微黃門平章事十二月乙卯定陵寢殿火丙辰幸温湯乙丑至自温湯閏月己亥姚崇源乾曜罷刑部尙書宋璟爲吏部尙書兼黃門監紫微侍郎蘇頲同紫微黃門平章事

五年正月癸卯太廟四室壞遷神主于太極殿素服避正殿輟視朝五日己酉享于太極殿辛亥如東都戊辰大霧二月甲戌大赦賜從官帛給復河南一年免河南北蝗水州今歲租三月丙寅吐蕃請和四月甲申毀拜洛受圖壇己丑

子嗣一卒五月丙辰詔公侯子孫襲封七月壬寅隴右節度使郭知運及吐蕃戰敗之九月壬寅復紫微省爲中書省黃門省爲門下省監爲侍中十月戊寅祔神主于太廟甲申命史官月奏所行事

六年正月辛丑突厥請和二月壬辰朔方道行軍大總管王峻伐突厥六月甲申瀍水溢八月庚辰以旱慮囚十月癸亥賜河南府懷汝鄭三州父老帛十一月辛卯至自東都丙申享于太廟元皇帝以上三祖枝孫失官者授五品京官皇祖妣家子孫在選者甄擇之免知頓及旁州供承者一歲租稅乙巳改傳國璽曰寶是月突厥執單于副都護張知運

七年五月己丑朔日有食之素服徹樂減膳中書門下慮囚六月戊辰吐蕃請和閏七月辛巳以旱避正殿徹樂減膳甲申慮囚八月丙戌慮囚九月甲戌徙封宋王憲爲寧王十月作義宗廟于東都辛卯幸溫湯癸卯至自溫湯十一月乙亥皇太子入學齒冑賜陪位官及學生帛

八年正月辛巳宋璟蘇頲罷京兆尹源乾曜爲黃門侍郎并州都督府長史張

嘉貞爲中書侍郎同中書門下平章事二月戊戌子敏卒三月甲子免水旱州  
逋負給復四鎮行人家一年五月丁卯源乾曜爲侍中張嘉貞爲中書令六月  
庚寅洛瀍穀水溢九月突厥寇甘源涼州都督楊敬述及突厥戰敗績丙寅降  
京城囚罪杖以下原之壬申契丹寇邊王峻檢校幽州都督節度河北諸軍大  
使黃門侍郎韋抗爲朔方道行軍大總管以伐之甲戌中書門下慮囚十月辛  
巳如長春宮壬午獵于下邳庚寅幸溫湯十一月乙卯至自溫湯

九年正月括田丙寅幸溫湯乙亥至自溫湯二月丙戌突厥請和丁亥免天下  
七年以前逋負四月庚寅蘭池胡康待賓寇邊五月庚午原見囚死流罪隨軍  
効力徒以下未發者七月己酉王峻執康待賓八月蘭池胡康願子寇邊九月  
乙巳朔日有食之癸亥天兵軍節度大使張說爲兵部尙書同中書門下三品  
十一月庚午大赦賜文武官階爵唐隆先天實封功臣坐事免若死者加贈賜  
民酺三日十二月乙酉幸溫湯壬辰至自溫湯是冬無雪

十年正月丁巳如東都二月丁丑次望春頓賜從官帛四月己亥張說持節朔



方軍節度大使五月戊午突厥請和辛酉伊汝水溢閏月壬申張說巡邊六月  
丁巳河決博棣二州七月庚辰給復遭水州丙戌安南人梅叔鸞反伏誅九月  
張說敗康願子于木盤山執之己卯京兆人權梁山反伏誅癸未吐蕃攻小勃  
律北庭節度使張孝嵩敗之十月甲寅如興泰宮獵于上宜川庚申如東都十  
二月突厥請和

十一年正月丁卯降東都囚罪杖以下原之己巳如并州降囚罪徒以下原之  
賜侍老物庚辰次潞州赦囚給復五年以故第爲飛龍宮辛卯次并州改并州  
爲北都癸巳赦太原府給復一年下戶三年元從家五年版授侍老八十以上  
上縣令婦人縣君九十以上上州長史婦人郡君百歲以上上州刺史婦人郡  
夫人二月乙酉貶張嘉貞爲幽州刺史壬子如汾陰祠后土賜文武官階勳爵  
帛癸亥張說兼中書令三月辛未至自汾陰免所過今歲稅赦京城四月甲子  
張說爲中書令吏部尙書王峻爲兵部尙書同中書門下三品五月乙丑復中  
宗于太廟己丑王峻持節朔方軍節度大使辛卯遣使分巡天下六月王峻巡

邊八月戊申追號宣皇帝曰獻祖光皇帝曰懿祖十月丁酉幸温湯作温泉宮  
甲寅至自温湯十一月戊寅有事于南郊大赦賜奉祠官階勳爵親王公主一  
子官高年粟帛孝子順孫終身勿事天下酺三日京城五日十二月甲午如鳳  
泉湯戊申至自鳳泉湯庚申貶王峻爲蘄州刺史

十二年四月壬寅詔傍繼國王禮當廢而屬近者封郡王七月己卯廢皇后王  
氏爲庶人十月庶人王氏卒十一月庚午如東都庚辰溪州首領覃行章反伏  
誅辛巳申王撝薨閏十二月丙辰朔日有食之

十三年正月戊子降死罪流以下原之遣使宣慰天下壬子葬朔方隴右河西  
戰亡者三月甲午徙封郟王潭爲慶王陝王浚忠王鄴王洽棣王甄王滉榮王  
封子浚爲光王繼儀王灃穎王澤永王清壽王洄延王沐盛王溢濟王九月丙  
戌罷奏祥瑞十月辛酉如兗州庚午次濮州賜河南北五百里內父老帛十一  
月庚寅封于泰山辛卯禪于社首壬辰大赦賜文武官階勳爵致仕官一季祿  
公主嗣王郡縣主一子官諸蕃酋長來會者一官免所過一歲兗州二歲租賜

天下醜七日丙申幸孔子宅遣使以太牢祭其墓給復近墓五戶丁酉賜徐曹  
毫許仙豫六州父老帛十二月己巳如東都

十四年二月邕州獠梁大海反伏誅四月丁巳戶部侍郎李元紘爲中書侍郎  
同中書門下平章事庚申張說罷丁卯岐王範薨六月戊午東都大風拔木壬  
戌詔州縣長官言事七月癸未灑水溢八月丙午河決魏州九月己丑磧西節  
度使杜暹檢校黃門侍郎同中書門下平章事十月甲寅太白晝見庚申如廣  
成湯己巳如東都十二月丁巳獵于方秀川

十五年正月辛丑河西隴右節度使王君奭及吐蕃戰于青海敗之七月甲戌  
震興教門觀災庚寅洛水溢己亥降都城囚罪徒以下原之八月澗穀溢毀灑  
池縣己巳降天下死罪嶺南邊州流人徒以下原之九月丙子吐蕃寇瓜州執  
刺史田元獻閏月庚子寇安西副大都護趙頤貞敗之庚申回紇襲甘州王君  
奭死之十月己卯至自東都十一月丁卯獵于城南十二月乙亥幸溫泉宮丙  
戌至自溫泉宮

十六年正月壬寅趙頤貞及吐蕃戰于曲子城敗之乙卯瀧州首領陳行範反  
伏誅庚申許徒以下囚保任營農三月辛丑免營農囚罪七月吐蕃寇瓜州刺  
史張守珪敗之乙巳隴右節度使張志亮河西節度使蕭嵩克吐蕃大莫門城  
八月辛卯及吐蕃戰于祁連城敗之九月丙午以久雨降囚罪徒以下原之十  
月己卯幸溫泉宮己丑至自溫泉宮十一月癸巳蕭嵩爲兵部尙書同中書門  
下平章事甲辰弛陂澤禁戍申幸寧王憲第庚戌至自寧王憲第十二月丁卯  
幸溫泉宮丁丑至自溫泉宮

十七年二月丁卯薨州都督張審素克雲南昆明城鹽城三月戊戌張守珪及  
吐蕃戰于大同軍敗之四月癸亥降死罪流以下原之乙亥大風震藍田山崩  
六月甲戌源乾曜杜暹李元紘罷蕭嵩兼中書令戶部侍郎宇文融爲黃門侍  
郎兵部侍郎裴光庭爲中書侍郎同中書門下平章事九月壬子貶宇文融爲  
汝州刺史十月戊午朔日有食之十一月庚寅享于太廟丙申拜橋陵赦奉先  
縣戊戌拜定陵己亥拜獻陵壬寅拜昭陵乙巳拜乾陵戊申至自乾陵大赦免

今歲稅之半賜文武官階爵侍老帛旌表孝子順孫義夫節婦終身勿事唐隆  
兩營立功三品以上予一子官免供頓縣今歲稅賜諸軍行人勳兩轉十二月  
辛酉幸溫泉宮壬申至自溫泉宮是冬無雪

十八年正月辛卯裴光庭爲侍中二月丙寅大雨雷震左飛龍殿災辛未免囚  
罪杖以下四月乙卯築京師外郭五月己酉奚契丹附于突厥六月甲子有彗  
星出于五車癸酉有星孛于畢昴乙亥灑水溢丙子忠王浚爲河北道行軍元  
帥壬午洛水溢九月丁巳忠王浚兼河東道諸軍元帥十月戊子吐蕃請和庚  
寅如鳳泉湯癸卯至自鳳泉湯十一月丁卯幸溫泉宮丁丑至自溫泉宮

十九年正月殺灤州別駕王毛仲丙子耕于興慶宮己卯禁捕鯉魚四月壬午  
降死罪以下丙申立太公廟六月乙酉大風拔木七月癸丑吐蕃請和八月辛  
巳以千秋節降死罪流以下原之十月丙申如東都十一月乙卯次洛城南賜  
從官帛是歲揚州穰稻生

二十年正月乙卯信安郡王禕爲河東河北道行軍副元帥以伐奚契丹二月



甲戌朔日有食之壬午降囚罪徒以下原之三月己巳信安郡王禕及奚契丹戰于薊州敗之五月戊申忠王浚俘奚契丹以獻六月丁丑浚爲司徒八月辛未朔日有食之九月乙巳渤海靺鞨寇登州刺史韋俊死之左領軍衛將軍蓋福慎伐之戊辰以宋滑兗鄆四州水免今歲稅十月壬午如潞州丙戌中書門下慮巡幸所過囚辛卯赦潞州給復三年賜高年粟帛十一月辛丑如北都癸丑赦北都給復三年庚申如汾陰祠后土大赦免供頓州今歲稅賜文武官階勳爵諸州侍老帛武德以來功臣後及唐隆功臣三品以上一子官民酺三日十二月辛未至自汾陰

二十一年正月丁巳幸溫泉宮二月丁亥至自溫泉宮三月乙巳裴光庭薨甲寅尙書右丞韓休爲黃門侍郎同中書門下平章事閏月癸酉幽州副總管郭英傑及契丹戰于都山英傑死之四月乙卯遣宣慰使黜陟官吏決繫囚丁巳寧王憲爲太尉薛王業爲司徒五月戊子以皇太子納妃降死罪流以下原之七月乙丑朔日有食之九月壬午封子沔爲信王泚義王淮陳王澄豐王漣恆



王游涼王滔深王十月庚戌幸溫泉宮己未至自溫泉宮十二月丁巳蕭嵩韓  
休罷京兆尹裴耀卿爲黃門侍郎中書侍郎張九齡同中書門下平章事

二十二年正月己巳如東都二月壬寅秦州地震給復壓死者家一年三人者  
三年四月甲辰降死罪以下甲寅北庭都護劉渙謀反伏誅五月戊子裴耀卿  
爲侍中張九齡爲中書令黃門侍郎李林甫爲禮部尚書同中書門下三品是  
日大風拔木六月壬辰幽州節度使張守珪俘奚契丹以獻七月己巳薛王業  
薨十一月甲戌免關內河南八等以下戶田不百畝者今歲租十二月戊子朔  
日有食之乙巳張守珪及契丹戰敗之殺其王屈烈

二十三年正月乙亥耕籍田大赦侍老百歲以上版授上州刺史九十以上中  
州刺史八十以上上州司馬賜陪位官勳爵征防兵父母年七十者遣還民酺  
三日八月戊子免鰥寡惻獨今歲稅米十月戊申突騎施寇邊閏十一月壬午  
朔日有食之是冬東都人劉普會反伏誅

二十四年正月丙午北庭都護蓋嘉運及突騎施戰敗之四月丁丑降死罪以

下五月丙午醴泉人劉志誠反伏誅八月甲寅突騎施請和乙亥汴王瓌薨十月戊申京師地震甲子次華州免供頓州今歲稅賜刺史縣令中上考降兩京死罪流以下原之丁卯至自東都十一月辛丑東都地震壬寅裴耀卿張九齡罷李林甫兼中書令朔方軍節度副大使牛仙客爲工部尙書同中書門下三品十二月戊申慶王琮爲司徒

二十五年三月乙酉張守珪及契丹戰于捺祿山敗之辛卯河西節度副大使崔希逸及吐蕃戰于青海敗之四月辛酉殺監察御史周子諒乙丑廢皇太子瑛及鄂王瑤光王瑒爲庶人皆殺之十一月壬申幸溫泉宮乙酉至自溫泉宮十二月丙午惠妃武氏薨丁巳追冊爲皇后

二十六年正月甲戌潮州刺史陳思挺謀反伏誅乙亥牛仙客爲侍中丁丑迎氣于東郊降死罪流以下原之以京北稻田給貧民禁王公獻珍物賜文武官帛壬辰李林甫兼隴右節度副大使二月乙卯牛仙客兼河東節度副大使三月丙子有星孛于紫微癸巳京師地震吐蕃寇河西崔希逸敗之鄯州都督杜

希望克其新城四月己亥有司讀時令降死罪流以下原之五月乙酉李林甫兼河西節度副大使六月庚子立忠王璵爲皇太子七月己巳大赦賜文武九品以上及五品以上子爲父後者勳一轉侍老粟帛加版授免京畿下戶今歲租之半賜民酺三日九月丙申朔日有食之庚子益州長史王昱及吐蕃戰于安戎城敗績十月戊寅幸溫泉宮壬辰至自溫泉宮

二十七年正月壬寅榮王琬巡按隴右二月己巳羣臣上尊號曰開元聖文神武皇帝大赦免今歲稅賜文武階官爵版授侍老百歲以上下州刺史婦人郡君九十以上上州司馬婦人縣君八十以上縣令婦人鄉君賜民酺五日八月乙亥磧西節度使蓋嘉運敗突騎施于賀邏嶺執其可汗吐火仙壬午吐蕃寇邊河西隴右節度使蕭炁敗之十月丙戌幸溫泉宮十一月辛丑至自溫泉宮二十八年正月癸巳幸溫泉宮庚子至自溫泉宮三月丁亥朔日有食之壬子益州司馬章仇兼瓊敗吐蕃克安戎城五月癸卯吐蕃寇安戎城兼瓊又敗之十月甲子幸溫泉宮以壽王妃楊氏爲道士號太真戊辰以徐泗二州無蠶免

今歲稅辛巳至自溫泉宮十一月牛仙客罷朔方河東節度副大使

二十九年正月癸巳幸溫泉宮丁酉立玄元皇帝廟禁厚葬庚子至自溫泉宮  
五月庚戌求明道德經及莊列文子者降死罪流以下原之七月乙亥伊洛溢  
九月丁卯大雨雪十月丙申幸溫泉宮戊戌遣使黜陟官吏十一月庚戌邠王  
守禮薨辛酉至自溫泉宮己巳雨木冰辛未寧王憲薨追冊爲皇帝及其妃元  
氏爲皇后十二月癸未吐蕃陷石堡城

天寶元年正月丁未大赦改元詔京文武官材堪刺史者自舉賜侍老八十以  
上粟帛九品以上勳兩轉甲寅陳王府參軍田同秀言玄元皇帝降于丹鳳門  
通衢二月丁亥羣臣上尊號曰開元天寶聖文神武皇帝辛卯享玄元皇帝于  
新廟甲午享于太廟丙申合祭天地于南郊大赦侍老加版授賜文武官階爵  
改侍中爲左相中書令爲右相東都爲東京北都爲北京州爲郡刺史爲太守  
七月癸卯朔日有食之辛未牛仙客薨八月丁丑刑部尙書李適之爲左相十  
月丁酉幸溫泉宮十一月己巳至自溫泉宮十二月戊戌隴右節度使皇甫惟

明及吐蕃戰于青海敗之庚子河西節度使王倓克吐蕃漁海遊奕軍朔方軍節度使王忠嗣及奚戰于紫乾河敗之遂伐突厥是冬無冰

二年正月乙卯作昇仙宮丙辰加號玄元皇帝曰大聖祖三月壬子享于玄元宮追號大聖祖父周上御大夫敬曰先天大皇咎繇曰德明皇帝涼武昭王曰興聖皇帝改西京玄元宮曰太清宮東宮曰太微宮四月己卯皇甫惟明克吐蕃洪濟城六月甲戌震東京應天門觀災十月戊寅幸溫泉宮十一月乙卯至自溫泉宮十二月壬午海賊吳令光寇永嘉郡是冬無雪

三載正月丙申改年爲載降死罪流以下原之辛丑幸溫泉宮辛亥有星隕于東南二月庚午至自溫泉宮丁丑河南尹裴敦復晉陵郡太守劉同昇南海郡太守劉巨鱗討吳令光閏月令光伏誅三月壬申降死罪流以下原之八月丙午拔悉蜜攻突厥殺烏蘇米施可汗來獻其首十月甲午幸溫泉宮十一月丁卯至自溫泉宮十二月癸丑祠九宮貴神于東郊大赦詔天下家藏孝經賜文武官階爵侍老粟帛民酺三日



四載正月丙戌王忠嗣及突厥戰于薩河內山敗之三月壬申以外孫獨孤氏女爲靜樂公主嫁于契丹松漠都督李懷節楊氏女爲宜芳公主嫁于奚饒樂都督李廷寵八月壬寅立太真爲貴妃九月契丹奚皆殺其公主以叛甲申皇甫惟明及吐蕃戰于石堡城副將褚誨死之十月戊戌幸溫泉宮十二月戊戌至自溫泉宮

五載正月乙亥停六品以下員外官三月丙子遣使黜陟官吏四月庚寅李適之罷丁酉門下侍郎陳希烈同中書門下平章事五月壬子朔日有食之七月殺括蒼郡太守韋堅播川郡太守皇甫惟明十月戊戌幸溫泉宮十一月乙巳至自溫泉宮十二月甲戌殺贊善大夫杜有鄰著作郎王鄴左驍衛兵曹參軍柳勳左司禦率府倉曹參軍王脩己右武衛司戈盧寧左威衛參軍徐徵

六載正月辛巳殺北海郡太守李邕淄川郡太守裴敦復丁亥享于太廟戊子有事于南郊大赦流人老者許致仕停立仗銀賜文武官階爵侍老粟帛民醮三日三月甲辰陳希烈爲左相七月乙酉以旱降死罪流以下原之十月戊申



幸華清宮十一月丁酉殺戶部侍郎楊慎矜及其弟少府少監慎餘洛陽令慎名十二月癸丑至自華清宮是歲安西副都護高仙芝及小勃律國戰敗之七載五月壬午羣臣上尊號曰開元天寶聖文神武應道皇帝大赦免來載租庸以魏周隋爲三恪賜京城父老物人十段七十以上版授本縣令婦人縣君六十以上縣丞天下侍老百歲以上上郡太守婦人郡君九十以上上郡司馬婦人縣君八十以上縣令婦人鄉君賜文武官勳兩轉民酺三日十月庚戌幸華清宮十二月辛酉至自華清宮

八載四月殺威寧郡太守趙奉璋六月乙卯隴右節度使哥舒翰及吐蕃戰于石堡城敗之閏月丙寅謁太清宮加上玄元皇帝號曰聖祖大道玄元皇帝增祖宗帝后謚羣臣上尊號曰開元天地大寶聖文神武應道皇帝大赦男子七十婦人七十五以上皆給一子侍賜文武官階爵民爲戶者占爵酺三日十月乙丑幸華清宮是月特進何履光率十道兵以伐雲南十一月丁巳幸御史中

丞楊釗莊

九載正月己亥至自華清宮丁巳詔以十一月封華嶽三月辛亥華嶽廟災關  
內旱乃停封五月庚寅慮囚九月辛卯以商周漢爲三恪十月庚申幸華清宮  
太白山人王玄翼言玄元皇帝降于寶仙洞十二月乙亥至自華清宮是歲雲  
南蠻陷雲南郡都督張虔陀死之

十載正月壬辰朝獻于太清宮癸巳朝享于太廟甲午有事于南郊大赦賜侍  
老粟帛醕三日丁酉李林甫兼朔方軍節度副大使安北副大都護己亥改傳  
國寶爲承天大寶戊申安西四鎮節度使高仙芝執突騎施可汗及石國王四  
月壬午劍南節度使鮮于仲通及雲南蠻戰于西洱河大敗績大將王天運死  
之陷雲南都護府七月高仙芝及大食戰于怛邏斯城敗績八月范陽節度副  
大使安祿山及契丹戰于吐護真河敗績乙卯廣陵海溢丙辰武庫災十月壬  
子幸華清宮十一月乙未幸楊國忠第

十一載正月丁亥至自華清宮二月庚午突厥部落阿布思寇邊三月乙巳改  
尚書省八部各四月乙酉戶部郎中王鐸京兆人邢絳謀反伏誅丙戌殺御史

大夫王鉞李林甫罷安北副大都護五月戊申慶王琮薨甲子東京大風拔木  
六月壬午御史大夫兼劍南節度使楊國忠敗吐蕃于雲南克故洪城十月戊  
寅幸華清宮十一月乙卯李林甫薨庚申楊國忠爲右相十二月丁亥至自華  
清宮

十二載五月己酉復魏周隋爲三恪六月阿布思部落降八月中書門下慮囚  
九月甲寅葛邏祿葉護執阿布思十月戊寅幸華清宮

十三載正月丙午至自華清宮二月壬申朝獻于太清宮加上玄元皇帝號曰  
大聖祖高上大道金闕玄元天皇帝癸酉朝享于太廟增祖宗諡甲戌羣臣  
上尊號曰開元天地大寶聖文神武證道孝德皇帝大赦左降官遭父母喪者  
聽歸賜孝義旌表者勳兩轉侍老百歲以上版授本郡太守婦人郡夫人九十  
以上郡長史婦人郡君八十以上縣令婦人縣君太守加賜爵一級縣令勳兩  
轉民酺三日丁丑楊國忠爲司空是日雨土三月隴右河西節度使哥舒翰敗  
吐蕃復河源九曲辛酉大風拔木五月壬戌觀酺于勤政樓北庭都護程千里

俘阿布思以獻六月乙丑朔日有食之劍南節度留後李宓及雲南蠻戰于西  
洱河死之八月丙戌陳希烈罷文部侍郎韋見素爲武部尚書同中書門下平  
章事是秋漚洛水溢十月乙酉幸華清宮十二月戊午至自華清宮

十四載三月壬午安祿山及契丹戰于潢水敗之五月天有聲于浙西八月辛  
卯降死罪流以下原之免今載租庸半賜侍老米十月庚寅幸華清宮十一月  
安祿山反陷河北諸郡范陽將何千年殺河東節度使楊光翹壬申伊西節度  
使封常清爲范陽平盧節度使以討安祿山丙子至自華清宮九原郡太守郭  
子儀爲朔方軍節度副大使右羽林軍大將軍王承業爲太原尹衛尉卿張介  
然爲河南節度採訪使右金吾大將軍程千里爲上黨郡長史以討安祿山丁  
丑榮王琬爲東討元帥高仙芝副之十二月丁亥安祿山陷靈昌郡辛卯陷陳  
留郡執太守郭納張介然死之癸巳安祿山陷滎陽郡太守崔無詖死之丙申  
封常清及安祿山戰于鬻子谷敗績丁酉陷東京留守李愷御史中丞盧奕判  
官蔣清死之河南尹達奚珣叛降于安祿山己亥恆山郡太守顏杲卿貽何千

年執之克趙鉅鹿廣平清河河間景城樂安博平博陵上谷文安信都魏鄴十  
四郡癸卯封常清高仙芝伏誅哥舒翰持節統領處置太子先鋒兵馬副元帥  
守潼關甲辰郭子儀及安祿山將高秀巖戰于河曲敗之戊申榮王琬薨壬子  
濟南郡太守李隨單父尉賈賁濮陽人尙衡以兵討安祿山是月平原郡太守  
顏真卿饒陽郡太守盧全誠司馬李正以兵討安祿山

十五載正月乙卯東平郡太守嗣吳王祗以兵討安祿山丙辰李隨爲河南節  
度使以討安祿山壬戌祿山陷恆山郡執顏杲卿袁履謙陷鄴廣平鉅鹿趙上  
谷博陵文安魏信都九郡癸亥朔方軍節度副使李光弼爲河東節度副大使  
以討祿山甲子南陽郡太守魯炆爲南陽節度使率嶺南黔中山南東道兵屯  
于葉縣乙丑安慶緒寇潼關哥舒翰敗之丁丑真源令張巡以兵討安祿山二  
月己亥嗣吳王祗及祿山將謝元同戰于陳留敗之李光弼克恆山郡郭子儀  
出井陘會光弼及安祿山將史思明戰敗之庚子賈賁戰于雍丘死之三月顏  
真卿克魏郡史思明寇饒陽平原乙卯張巡及安祿山將令狐潮戰于雍丘敗



之丙辰殺戶部尙書安思順太僕卿安元貞乙丑李光弼克趙郡四月乙酉北海郡太守賀蘭進明以兵救平原丙午太子左贊善大夫來瑱爲潁川郡太守兼招討使五月丁巳魯炁及安祿山戰于澠水敗績奔于南陽戊辰嗣虢王巨爲河南節度使六月癸未顏真卿及安祿山將袁知泰戰于堂邑敗之賀蘭進明克信都丙戌哥舒翰及安祿山戰于靈寶西原敗績是日郭子儀李光弼及史思明戰于嘉山敗之辛卯蕃將火拔歸仁執哥舒翰叛降于安祿山遂陷潼關上洛郡甲午詔親征京兆尹崔光遠爲西京留守招討處置使丙申行在望賢宮丁酉次馬嵬左龍武大將軍陳玄禮殺楊國忠及御史大夫魏方進太常卿楊暄賜貴妃楊氏死是日張巡及安祿山將翟伯玉戰于白沙塢敗之己亥祿山陷京師辛丑次陳倉閑廩使任沙門叛降于祿山丙午次河池郡劍南節度使崔圓爲中書侍郎同中書門下平章事七月甲子次普安郡憲部侍郎房瑄爲文部尙書同中書門下平章事丁卯皇太子爲天下兵馬元帥都統朔方河東河北平盧節度使御史中丞裴冕隴西郡司馬劉秩副之江陵大都督丞



王璘爲山南東路黔中江南西路節度使盛王琦爲廣陵郡都督江南東路淮南道節度使豐王珙爲武威郡都督河西隴右安西北庭節度使庚午次巴西郡以太守崔渙爲門下侍郎同中書門下平章事韋見素爲左相庚辰次蜀郡八月壬午大赦賜文武官階爵爲安祿山脅從能自歸者原之癸巳皇太子卽皇帝位于靈武以聞庚子上皇天帝誥遣韋見素房瑄崔渙奉皇帝冊于靈武十一月甲寅憲部尙書李麟同中書門下平章事十二月甲辰永王璘反廢爲庶人至德二載正月庚戌誥求天下孝悌可旌者甲子劍南健兒賈秀反伏誅三月庚午通化郡言玄元皇帝降五月庚申誥追冊貴嬪楊氏爲皇后七月庚戌行營健兒李季反伏誅庚午劍南健兒郭千仞反伏誅十月丁巳皇帝復京師以聞誥降劍南囚罪流以下原之十二月丁未至自蜀郡居于興慶宮三載上號曰太上至道聖皇天帝上元元年徙居于西內甘露殿元年建巳月崩于

神龍殿年七十八

贊曰睿宗因其子之功而在位不久固無可稱者嗚呼女子之禍於人者甚矣

自高祖至于中宗數十年間再罹女禍唐祚旣絕而復續中宗不免其身韋氏  
遂以滅族玄宗親平其亂可以鑒矣而又敗以女子方其勵精政事開元之際  
幾致太平何其盛也及侈心一動窮天下之欲不足爲其樂而溺其所甚愛忘  
其所可戒至於竄身失國而不悔考其始終之異性習之相遠也至於如此可  
不慎哉可不慎哉

唐書卷五

唐書卷五考證

玄宗紀天寶三載正月辛亥有星隕于東南○舊書作閏月辛亥天文志亦作

閏月今作正月似誤

十五載三月丙辰殺戶部尙書安思順○舊書在二月臣西按二月無丙辰當

從新書

唐書卷五考證